



pngelectionprinting.com

THEODIST LTD
THE STATIONERY SUPERMARKET

POSTERS BANNERS CARDS A-FRAMES FLYERS CAR STICKERS CORFLUTE SIGNS

2017 Jeneral Ileksen i stat

Paul Zuvani i raitim

PAPUA Niugini 2017 Jeneral Ileksen i stat tude.
Gavana Jeneral Bob Dadae long Gavman Haus, Konedobu long 9 klok moning bai sainim na givim aut 88 open sia na 22 rijonal sia rit o tok orait bilong Ileksen i kamap long ol distrik na provins.
Sainim na givim bilong ol rit i opim tu opis bilong ol kandidate i laik resis long ol i stat nominet.

Nominesen taim bai kisim wanpela wik we i stat tude na bai pinis long neks wik Fonde.
Planti kandidate bai go wantaim sapota bilong ol long nominet.
Long Nesenel Kapitel Distrik Gavana Powes Parkop long dispela wik i tokaut long em i nominet long Ilektral opis long Boroko long 4 klok nau apinun. Long wankain taim Memba bilong Mosi Saut na Minista bilong Spot Justin Tkatchenko bai nominet long Ilektral opis long

Konedobu.
Ilektral Komisen i tok bihainim namba bilong ol kandidate husat i pulumapim baio-data fom (Fom 29) long resis long ileksen i soim olsem 4068 manmeri i laik resis long ileksen.
Tasol dispela namba inap senis sapos ol i no nominet o kamap long taim long nominet.
Nominesen fi i stap wankain long K1000.

I go moa long pes 2...

Gud Fraide kam gut...



JISAS I DAI:
Long namba 14 stesin bilong Rot bilong Kruse ol yangpela long Mary Kwin ov Pasifik peris long Waigani i mekim drama long soim ol disaipel i krai na i kisim bodi bilong Jisas i go planim.
Poto: Paul Zuvani

INSAIT

Dem Carol Kidu men ov Hona awot petron



Pes 3
The Giluwe News



Pes 11

Laipstail

Beon kalabus lain autim gutpela stori long Ista Sande



Pes 14

Sevim K25 lo niupela

Red-X phone

Lukim page 7 lo moa.

2017 Jeneral Ileksen stat tude

I kam long pes 1...

Long taim nominesen i op ol kendidet bai stat long kempen tude na i go.

Long kempen Ilektoral Komisen i putim lo long ol kendidet i mas bihainim.

Sampela lo em:

- Ol kendidet i mas bihainim lo bilong kantri, bilong PNGEC na bilong Ogenik Lo bilong Politikal Pati na Kendidet (OLLIPAC) bipo na bihain taim bilong ileksen;
- I no ken givim presen, mani o ol arapea samting long grisim ol manmeri long votim ol;
- Ol i no ken sanapim ol haus bilong kempen long ol komyuniti;
- Ol kendidet i no ken yusim ol samting bilong gavman olsem kar, mani, pepa o ol arapela samting bilong wok;
- Ol i mas rispektim rait bilong ol arapela kendidet; na
- Ol i no ken daunim narapela kendidet bikos long wok bilong em.

Gamato i tok long dispela ileksen 45 politikal pati i rejista long sanapim kendidet bilong ol. Sampela bilong ol em Pipel's Nesanel Kongres wantaim ol kolisen pati bilong em Nesanel Alaiens, Yunaitet Risoses Pati, Kristen Demokratik pati, Sosel Demokratik, Melanesian Alaiens, Pangu, Pipels Progres pati, Pipels Demokratik pati, Yunaitet pati, Nesanel pati, Traiempen Herites Empawamen pati na PNG pati.

Long balot pepa em i tok em i kisim pinis 10 milien balot pepa long las wik long kampani we i printim dispela ol pepa long Indonesia.

Nau yet ol balot pepa i stap wantaim em na ol i kisim dispela ol pepa i go long wanpela hap bilong Pot Mosbi we ami na polis i putim bikpela was long ol.

Ol bai givim aut ol pepa bipo long poling i stat long 24 Jun.

Gamato i tok long 2012 Jenerel Ileksen 4.8 milien manmeri i rejista long vot.

Long 2017 5.6 milien manmeri i rejista long vot.

Ol de bilong ileksen i stap wankain:

- 20 Epril 2017, rit na nominesen i op;
- 27 Epril 2017, nominesen i pas;
- 24 Jun i go long 8 Julai 2017 - poling i kamap;
- 24 Julai 2017 - ol rit i go bek long Gavana Jeneral.

Gamato: Kendidet mas bihainim lo bilong kempen

PAPUA Niugini Ilektoral Komisen (PNGEC) i tok ol kendidet i mas bihainim lo long taim bilong kempen.

Ol i mas bihainim lo bilong kantri, bilong PNGEC na bilong Ogenik Lo bilong Politikal Pati na Kendidet (OLLIPAC) bipo na bihain taim bilong ileksen.

Ol i no ken givim presen, mani o ol narapea samting

long grisim ol manmeri long votim ol long ileksen.

Ol i no ken sanapim ol haus bilong kempen long ol komyuniti.

Ol kendidet i no ken yusim ol samting bilong gavman olsem kar, mani, pepa o ol arapela samting bilong wok.

Ol i mas rispektim rait bilong ol arapela kendidet.

Ol i mas ripot i go long

komyuniti we man o meri bilong dispela komyuniti i askim ol long baim ol o givim samting long ol olsem mani o baim kar na ol i ken votim ol.

Ol i mas ripot hariap i go long Ilektoral Komisen (EC) sapos wanpela sapota bilong kendidet i brukim lo bilong gavman, EC o OLLIPAC.

Kendidet i mas bihainim polis bilong pati bilong em na i no ken daunim narapela

kendidet bikos long wok bilong em.

Promotim na stap insait long kempen o bung we tok pait bilong tingting na polisi i kamap.

Kendidet i mas redi na wanbel long mak em i kamap long em bihain long vot na i mas askim ol sapota long mekim wankain. Ol i no ken kros na bagarapim ol samting bihain long ileksen.



Nupela ol haus bilong Enga Nasing Koles...

TENKYU: Enga Provinsal Gavman na Australia Hai Komisen i lonsim nupela ol haus bilong Enga Nes Koles long dispela wik. Dispela domitori gat inap ples na bai kisim 42 sumatin. I gat nupela haus kuk bilong ol sumatin i kuk na kaikai long em. Australia Gavman i yusim K4.8 milien long mekim domitori bilong ol meri. Enga provinsal gavman i yusim K2.2 milien long mekim domitori bilong ol man. Poto hia i soim Enga Gavana Sir Peter Ipatas i kisim ki long Australia Hai Komisen Bruce Davis long soim olsem ol sumatin i ken yusim domitori nau. **Poto: Australia Hai Komisen**

Australia Praim Minista lukluk raun long PNG

NAMBA wan taim wokabout bilong Praim Minista bilong Australia i kam long Papua Niugini long stat bilong dispela mun i lukluk moa long treid, sekyuriti, iekonomik divelopmen na edukesen.

Em i bin kam raun long de 7 Epril i go inap long de 9. Em i bin bungim Praim Minista Peter O'Neil na i go lukluk raun long Kokoda Trek long tingim 75 eniveseri bilong Niugini Kempen long Wol Woa 2.

Dispela lukluk raun em bilong strongim baileteral iekonomik wok namel long Pasifik we em i bin stap insait long sampela ol bikpela bisnis bung.



Praim Minista bilong Australia i kamap long Jackson ples balus na kisim gat ov ona. Poto: AHCMidia.



Wasa Rice 200g
Em Skel Ya
GROWN FOR THE PEOPLE OF PNG

Dem Carol Kidu men ov Hona awot petron

BIPO Memba bilong Mosbi Saut Dem Carol Kidu i kamap nupela petron bilong Digicel Men ov Hona Awot petron.

Digicel Faundesen i kamapim dispela ol awot.

Faundesen sif eksekutiv opisa Beatrice Mahuru i tok dispela awot i kamap long tokim ol man olsem ol i no ken bagarapim ol meri na i mas rispektim ol na ol long wok bilong ol.

Em i tok makim bilong Dem Carol i soim gutpela wok Dem Carol i kamapim long 15-ya em i stap na wok olsem politik meri.

Em i kisim ples bilong Nesanel Kapital Distrik Gavana Powes Parkop.

Long tokaut long makim bilong Dem Carol, Mahuru i tok: "Mi bilip dispela luksave



Dem Carol Kidu (lep han), nupela petron bilong Men ov Hona awot wantaim Beatrice Mahuru, Sif Eksekutiv Opisa bilong Digicel Faundesen.

i soim pasin man bilong em (leit Sir Buri Kidu) i mekim

long ol meri na ol pikinini.

"Taim ol meri i kamapim gutpela wok, dispela i soim gutpela sapot man bilong ol i gat long ol."

Parkop i mas pinis long stap olsem petron bikos em i redi long go insait long 2017 Nesanel Ileksen.

Long taim em i wok politik na bihain long em i pinis Dem Carol i save sapotim wok bilong kempein egens long pasin bilong bagarapim meri na pikinini.

Long dispela yia Faundesen i kisim 18-pela fainelis namel long 94 nominesen.

Men ov Awot presentesen bai kamap long Stanley Hotel long Sarere 29 Epril, 2017.

Tiket em K1000 long wampela man na bisnis o koperet tebol bai kost K9000 long 10 man.

Polis nius

Polis operesen bilong NCD Ileksen bai stat klostu

POLIS operesen bilong 2017 Nesanel Ileksen long NCD em ol i bin kamapim pinis na bai stat wok klostu taim

NCD metropoliten polis komanda, Ben Turi, i tokaut olsem ol polis opisa bilong em i stap sambai long operesen.

Turi i tok, ol bai setim rot blok long siti long stat bilong ileksen i go inap long stat bilong kaunim vot na pinis bilong kaunim vot.

Turi i laikim ol kendidet long kempen long stret-pela rot na ol pablik i ken givim vot long ol.

Lae polis i stopim ol bagarap kar

OL polis long Lae, Morobe, i wok long stopim ol bagarap na bruk bruk PMV na kar long rot long siti.

Metropoliten Suprintenden, Anthony Wagambie Jnr i salim tok lukaut long ol papa bilong ol kar long stretim kar bilong ol gut na draivim raun.

Wagambie i tok, planti lain i bungim birua long ol kar long rot bikos ol kar i no stap gut.

Em i tok moa olsem trefik polis, Len Transpot Bod, Nesanel Rot Sefti Kaunsil na Moto Viekol Insurens Limited bai bung wantaim long dispela trefik operesen.

Ol i lokim planti Pablik Moto Viekol (PMV) na ol praivet kar pinis long baksait bilong Morobe Trefik Rejistri.

Wagambie i tok olsem ol bai no inap larim ol papa bilong ol dispela kar i kisim bek kar bilong ol inap ol i stretim kar bilong ol.

Polis long Bomana bareks bai bungim ol disiplineri sas

OL polis pesenel husat i no kisim tok orait long ol komanda na kisim haus long nupela Bomana bareks bai bungim disiplineri sas.

NCD metropoliten polis komanda, Ben Turi, i tokaut olsem planti bilong ol 150 famili husat i kisim tok orait long kisim haus long Bomana bareks em ol i no kisim.

Turi i tok olsem ol haus long Bomana em ol i bin mekim bilong ol polis husat i save stap long Gordons bareks bihain long ol helt lain i stopim ol long stap long Gordons.

Taim ol i tok orait long ol polis famili long go kisim haus long Bomana bareks, ol narapela polis opisa na famili husat ol i no tok orait long en i go na kisim ples long Bomana.

Turi i tok olsem ol polis opisa husat i no kisim tok orait long ol polis bos na i kisim haus long laik bilong ol em ol bai lukluk long ol olsem polis hetkwata i givim oda.

Ol bai sasim ol opisa husat i no bihainim oda bilong ol komanda na kisim haus long laik bilong ol.

Turi i tok olsem wankain samting i bin kamap long 1992, we ol polis pesenel i bin hariap tru kisim haus long Gems viles bihain long 1991 Saut Pasifik Gems.

"Ol opisa i no bin kisim tok orait na kisim haus long laik bilong ol em ol i bin sasim ol na sampela em ol i bin rausim ol long polis fos," Turi i tok.

"Nau, wankain samting bai kamap long Bomana bareks."

Gavana Jeneral i askim ol sumatin long yusim gut taim

Joyce Huanjo i raitim

GAVANA Jenerel bilong Papua Nuigini, Bob Dadae i askim ol Luteran sumatin long ol i mas bosim gut taim bilong ol.

Mista Dadae i bin mekim dispela kain tok long taim em i mekim toktok long ol Enuel Luteran Sumatin Ista Baibel kem long Gabmazung Luteran Praimeri skul long Lae. Em i askim ol pikinini long ol i mas holim pas God

long laip blong ol.

Em i tok moa olsem kantri i gat bilip long ol yanpela man-meri olsem ol lida bilong tumora sapos ol i stap insait long God.

Mista Dadae i serim ekspiriens bilong em na i tok insait long God tasol ol inap long painim gutpela sindaun na amamas.

Em i tok kantri bilong yumi inap ran gut sapos ol bilipman i holim han na sanap wantaim. GG i askim ol sumatin

long ol i mas balensim taim blong ol namel long skul wok, fri taim na lotu long wanem planti taim ol i save bagarapim skul wok bilong ol long mekim wansait wok tasol.

Gavana Jenerel Dadae i askim ol long stadi strong na God inap helpim ol.

Dispela i namba wantaim ol sumatin i lukim wampela Gavana Jenerel na ol i amamas tru.

Gavana Jenerel bilong kantri i stap long Lae long in-

stolesen sevis bilong em na i bin painim taim long kamap long kem na toktok long ol sumatin.

Wankain taim em i tok em i amamas long lukim ol pikinini i holim strong pasin lotu taim ol yangpela yet na i tok ol i bin mekim stretpela tingting long kamap long Ista kem taim ol arapela pren blong ol i pilai spot o selebret long narapela rot.

Gavana Jenerel Bob Dadae i mekim olgeta toktok olsem



Ol sampela sumatin i stap long 2017 Nesanel Luteran Sumatin Ista na Baibel Kem. Poto Jerry Daniels.



Guide your children to build a savings foundation. Start them early with a **KIDS SAVINGS** Account.

We are the Bank for Savings

WE ARE **BSP**





Makim gutpela lida, Polye tok


MANMERI i mas makim gutpela man long makim ol, Oposisen lida na Memba bilong Kandep Don Polye i tok.

Em i tok maski Papua Niugini i kisim Independens long 1975 na i tok em i Kristen kantri tasol insait long dispela tok em i wok long bilip long ol arapela giaman god.
 "Ol memba bilong palamen, ol bisnis na komyuniti lida i mas go pas long promotim makim bilong gutpela lidaman," Polye i tok.
 "Mipela i mas pasim dispela pasin bilong lukluk long ol pater, pasto na sios lida long go pas long toktok na soim pasin bilong gutpela lidasip.
 "Dispela i mas pinis na mipela ol-

geta i soim dispela pasin long tok-tok na pasin bilong mipela."
 Polye i mekim dispela tok long Lawe long Lai, Kandep long toktok long ol manmeri long ilektoret bilong em.
 Em i tenkim Bikpela God long harim pre bilong em long kamapim gutpela ol de long ol taim em i go bungim ol manmeri long wan wan hap bilong kantri.
 Em i tok gutpela lidasip we i bilip long God na bihainim pasin bilong em i no moa stap long kantri.
 Em i laikim dispela pasin i senis na promotim tok na pasin bilong Kristen olsem ol arapela kantri i ken save PNG i Kristen kantri.
 Em i tok long 2002 taim PNG i

bungim hevi bilong ikonomi, ol manmeri i wok long pre na Bikpela i harim pre bilong ol.
 Long dispela taim gutpela gavman aninit long lidasip bilong Sir Michael Somare we Polye i Deputi bilong em na dispela i lukim ikonomi i kamap strong gen.
 "Mipela i strongim ikonomi na i gat inap foren risev na dispela i strongim ol bisnis na moa wok bilong ol manmeri," Polye i tok.
 Em i tok Praim Minista Peter O'Neill i mekim kantri i pundaun gen.
 Long soim stret em i givim piksa long pe bilong pablik sevan i no kamap o kamap long taim, PNG

Pawa i rausim pawa bikos Gavman opis i no inap baim bil, strongim ol hai komisen opis bilong em long narapela ol kantri na planti moa hevi.
 Long katim mani mak i go long helt sekta, long i no peim tuisen fi fri (TFF) mani long taim stret na long mani makim ol i save askim long em.
 Wankain toktok Polye i mekim long Baiyer, Westen Hailans taim helikopta em i ran i go long em long Kandep na go long Hagen i go stap long Baiyer bikos long hevi bilong klaut na ren.
 Ol manmeri i welkamim em na amamas long toktok bilong em.




Don Polye, Oposisen lida

Kendidet askim ol pati long sekim gut kendidet

James Kila i raitim

OL politikal pati i mas sekim gut ol kendidet bipo long ol i endosim ol long resis long 2017 Nesenel Ileksen.
 Wanpela kendidet husat i laik resis long Usino-Bundi distrik, Basak Amari i mekim dispela tok.
 Amari i tok ol politikal pati i no ken harim gris o mauswara bilong ol manmeri husat i raun nating long Mosbi na



Basak Amari i nupela kenidet bilong resis long Usino-Bundi, Madang. Foto: James Kila

pasim tingting na endosim ol long resis.
 Em i tok ol pati i mas mekim gutpela wok painimaut o sevei na go insait long komyuniti na askim gut ol komyuniti lida, pasto o kukurai bilong ples pastaim na bihain i endosim ol kenideit.
 Basak i tok nau yet planti manmeri husat i stap long Mosbi i save bihainim ol politikal pati raun stap long Mosbi i save givim nem bilong ol

man olsem ol i gat biknem long ples.
 Em i tok planti ol pastaim pablik sevan nau i stap long Mosbi na no save go long ples bilong ol na save gut na pilim pen wantaim ol pipel i tok long resis.
 Dispela ol lain i save grisim ol eksekutiv bilong ol politikal pati na givim nem bilong brata long ol famili bilong ol na ol politikal pati i save endosim.
 Basak i tok dispela pasin i mas no ken kamap moa.
 Em i tok ol politikal pati i mas mekim wok painimaut gut pastaim na kisim ol lain long resis aninit long nem bilong ol.
 Ol i no ken lusim nating mani long lain husat i save toktok tumas na mauswara tasol long viles na hauslain bilong ol.

Parkop, Tkatchenko bilip long kam bek

Paul Zuvani i raitim

NESENEL Kapitel Distrik Gavana Powes Parkop na Mosbi Saut Memba Justin Tkatchenko i gat bilip long kam bek bihain long Julai Ileksen.
 Tupela i mekim dispela toktok long dispela wik long taim ol i tokaut long de ol i nominet.
 Tupela bai nominet long nau apinun taim rit i op.
 Gavana Jeneral Bob Dadae long Gavman Haus, Konedobu long 9 klok moning tude bai sainim na givimaut 88 open sia na 22 rijonal sia rit o tok orait bilong Ileksen i kamap long ol distrik na provins.
 Sainim na givimaut rit i opim 2017 Jeneral Ileksen.
 Nominesen de i stat tude na bai

pinis long neks wik Fonde.
 Parkop na Tkatchenko i tok bikos long wok bilong tupela ol i bilip manmeri bai votim ol long winim sia bilong ol.
 Gavana i tok em i kamapim planti wok na dispela ol wok i tokaut long em i husat.
 Sapos ol manmeri i tingting long dispela na vot, i no gat wanpela tok i ken mekim em i ting ol manmeri i no ken votim em gen.
 "Ol manmeri husat i sutim tok i ken sutim tok tasol sutim tok i wanpela samting na wok tru i narapela samting," Parkop i tok.
 "Mi no inap lusim taim nating long toktok long dispela. Ol manmeri yet i ken lukim na vot.
 "Planti gutpela senis i kamap long siti aninit long lidasip bilong mi na Tkatchenko."



Tkatchenko (lep han) na Parkop i redi long opim wanpela nupela klasrum bilong Kila Kila Sekenderi Skul, Pot Mosbi.

URGENT!!

URGENTLY REQUIRE STREET SALES AGENTS & DISTRIBUTORS TO DO BULK SUBSCRIPTION OF WANTOK NIUSPEPA IN THE FOLLOWING LOCATIONS

Rabaul, Kiunga, Tari, Jiwaka, Manus, Wabag, Kavieng, Simbu, Tabubil, Lae, Mendi, Bulolo, Popondetta, Wewak, Vanimo and Kerema

Qualification:
 No specific qualification is required, can be an individual, family, a retired worker or someone who is already engaged in doing News Paper contract work.

For more detail information please call
 The Circulation Supervisor, Mr. Mark Timbi on Phone: 3252500,
 mobile phone: 72703860/75690395 or
 email: mtimbi@wantokniuspepa.com
 circulation@wantokniuspepa.com

NMSA i sponsa long ANZAC de long Madang

NESENEL Martiaim Seft Atoriti (NMSA) em i enjese we i lukautim Kalibobo Laithaus long Madang na em i gat wok long helpim wantaim mani bilong holim ANZAC de moning sevis long 25 Epril 2017.

Aninit long Komyuniti Wok Program (CEP), NMSA i putim wanpela K3,000 mani long sponsaisai long "Moning kaikai" na ol wok bilong redim dispela de long 25 Epril.

Long olgeta yia long 25 Epril, ANZAC i save kamap long tingim bek ol Australia na Nu Silan soldia wantaim ol Papua Niugini manhusat i bin pait long Wol Woa 2. Planti pipel i bin dai taim Siapan i bin salim ami bilong en long pait wantaim ol alaid fos insait long kantri.

Planti Papua Niugini i bin pait wantaim ol alaid fos, long Milen Be, Oro long Kokoda, Lae, Fischafen, Madang na Wewak we ol i bin stopim ami bilong Japan long go kisim Australia.

Dispela em i wanpela liklik selebresen tasol long tingim dispela

bikpela samting tru i bin kamap insait long Wol Woa 2.

Long moning taim tru ol bai holim wanpela ekumenikal sevis o lotu na long Madang em dispela lotu na selebresen i save kamap bikpela moa insait long las 10-pela yia.

Ol i save holim lotu na tingim bek seremoni long hap we Kalibobo Coastwatcher Laithaus i sanap. Dispela i save pulim planti ol bisnis haus ol skul na koles na planti pablik manmeri.

Tasol long dispela yia ol ogenaia i ting bai gat bikpela moa bung bilong 4000 pipel wantaim Jesa Sean Payne husat i makim Australia Gavman na Australia Ami RAN sip HMAS Shepparton na Benalla bikos ol dispela sip bai stap long provins long dispela tiam na ol bai stap insait long Aanzac De Sevis.

NMSA Jeneral Menesa na Sif Eksektiv Opisa, Paul Unas i tok long ol yia i go pinis. NMSA i save stap insait long ol selebresen bilong ANZAC Moning

taim Sevis long provins.

"Olsem enjensi husat i lukautim Kalibobo Laithaus, NMSA i mas helpim long redi long dispela de bikos ol bai holim long hap bilong dispela

laithaus," em i tok.

Wantaim wanpela moning taim lotu bai i gat wanpela sotpela mas, pareid inspeksen, na bihain bai gat gan brekfas o moning kaikai.



Praim Minista bilong Australia, Malcolm Turnbull i ritim nem bilong ol soldia bilong Australia na ol lokal fasi wasi ensel long Kokoda Memoriel Senta long taim em i kamalukluk raun long PNG i no longtaim i go pinis. Foto: AHC midia.

US Marin i stap wantaim long trening bilong jenerel ileksen

OL Yunaitet Stet Marin i stap wantaim long trening long taim ol i kamap long Pot Mosbi long helpim ol PNG soldia long mekim sekyuriti wok long taim bilong jenerel ileksen na 2018 APEC bung.

Klostu long 100 Marin i trening wantaim ol lokal soldia long Ista wiken.

Ol trening i bin kamap long militeri bareks, Sir John Guise Stediam, ol hotel na pak.

Komanding Opisa bilong USS Marin grup, Bradley Coletti, i tok olsem ol dispela trening em bilong strongim US-PNG rilesensip long strongim Esia-Pasifik rijon.



US Marin i trening wantaim ol PNG soldia long Ista wiken.

Sevim K25 lo niupla RED-X phone

RED-X + free SIM + K7 moa wik lo liklik taim tasol.

Baim long ol bmobile-vodafone stores na agents.

PORT MORESBY

Head Office | Domestic & International Airport
Vision City | Waterfront-Foodworld | Koki Market

LAE

Post PNG Building

MT. HAGEN

Post PNG Compound

GOROKA

Bird of Paradise Hotel Suite 17

MADANG

Ela Emporium



Camera



Bluetooth



Internet



FM Radio



Torch

Special offer

K46



bmobile



vodafone

www.bmobile.com.pg

76003555 or 1555

connect@bmobile.com.pg

Komisen kamapim 5-ya plen



Pawa bilong vot bilong Yumi

OLSEM wanem na ileksen sistem bilong yumi i go hat olgeta? Bilong wanem tru na yumi ol vota i mas hetpen tru long makim lida?

Sapos yumi ol pipel i bilip long 'gavman em i bilong ol pipel na ol pipel yet i mas go pas', tasol yumi larim bikpela resis insait long hauslain yet husat tru bai i kisim taim long dispela pasin?

Lidasip em i no samting bilong pilai! Em i no bilong putim mi pasin i go pas! Lidasip em i bilong man o meri husat inap tru long holim ol pipel bilong em inap 5-pela krismas o moa ya i kam biahin.

Hamas pipel i save stap hangre long sevis bilong gavman taim man o meri ol i makim i save ranawe na hait long Mosbi tasol inap taim bilong ileksen gen? Dispela man o meri em i lida?

Nogat tru. Em i kago boi o gel bilong mani. Mani tasol i salim em i kam long ples long lukim ol vota na taim em i kisim namba pinis, em i save lus tingting long ol pipel husat i givim em vot. Em i save go bek long Mosbi na moni tu i save biahinim em i go bek.

Kago bilong lida tru em ol pipel bilong em. Em i save stap wantaim ol, taitim bun long maunten ples wantaim ol pipel na luksave long hevi bilong ol mama na pikinini na em i traim long bringim helpim i kam. Em i save krai wantaim ol pipel, tuhat wantaim ol na wokabaut long lek wantaim ol pipel bilong em. Em i save toktok liklik tasol na yau na ai bilong em i save op long lukim na harim ol pipel bilong em.

Hamas kago lida bilong mani yumi salim i go pinis long palamen na olgeta 5-pela krismas yumi save krai long sevis bilong gavman? Hamas kago lida i save opim maus na kapsaitim planti tok promis antap long yumi na yumi save wet i stap.

Yumi lukim hamas skul nau i singaut yet long mani gavman i promis long givim long ol. Dispela gavman i sanap strong long mekim skul em i fri long olgeta pikinini tasol sori tru em i no givim yet mani long ol hetmasta na hetmistres long ranim skul.

Sapos dispela kago lida bilong mani i stap long ples bilong yu, bai yu givim vot long em? Yumi mas luksave long husat tru em i lida na husat em i lida long maus tasol.

Skelim sapos insait long wanpela ples, tripela man o meri i laik ron long ileksen komyuniti bai i tok wanem long ol? Yumi mekim strong bilong dispela vot bilong yumi i go samting nating sapos yumi tok larim ol i ran.

Vot bilong yumi em i gat pawa na dispela vot i ken mekim tupela samting. Em i ken halivim long bringim gutpela sindaun long komyuniti, o em i ken halivim long bagarapim komyuniti.

Lidasip em i no pilai samting na vot bilong yumi em i sans bilong yumi long givim stia long gavman.

Dispela hap tok, 'gavman em i bilong pipel' em i min yumi ol pipel yet i makim man o meri husat inap holim ples bilong yumi na bringim em i go long wanpela gutpela mak.

TISA Sevis Komisen long bung bilong ol provinsal edvaisa na ol sinia opisa we i kamap long Mosbi long las wik i kamapim 5-ya Edukesen Plen 2016-2020.

Dispela plen i bilong lukim rot edukesen i mas kamap long em long narapela 5-pela ya.

Long bung Tisa Sevis Komisen (TSC), Baran Sori i askim ol sinia opisa long tingting bilong ol sapos ol i gat long helpim na strongim edukesen sekta long kantri.

Em i tok PNG Visen

2050 i kamapim soim rot long wanem samting ol i mas mekim long narapela 5-pela ya na go moa yet long 40 ya we bai bungim 2050 long kamap long ol tingting bilong 50-ya plen.

Em i tok Visen 2050 i tok: Long dispela ya "Mipela mas stap smat, save, stap gut, strong na amamas."

Em i tok Visen 2050 i gat 7-pela pila we i save wok bung wantaim pila o pasin bilong man. Pila wan i tok long Humen Kapital Developmen, Jenda, Yut na Pipel Em-

pawamen, wan wan hap bilong Pila wan i save tok gut long as tingting dispela ol hap.

Em i tok hap bilong plen we pas long Tisa Sevis em As Tingting o Gol 1, 2 na 3 we i pas long Skul Edukesen, Teknikol/Vokesenel Edukesen na Trening na Haia Edukesen wantaim.

As tingting biahin long dispela ol het tok em Fri, Kualiti na Yuni-vesal Besik Edukesen long olgeta pikinini husat inap go long skul stat long Elementari Prep i go inap long Gred 12.

Wantaim kain plen Sori i tok long lukim dispela plen i kamap tru ol bai mas wok hat.

"Dispela i min moa tisa i mas kamap, moa klasrum i mas kamap na moa lening na tisa metiriel i mas kamap," em i tok.

"Long kamapim na strongim ol wok manmeri bilong Tisa Sevis dispela bai lukim moa manmeri bilong Papua Niugini i gat save bilong mekim wok."

Em i tok narapela wok bilong plen em bilong kamapim rot bilong karim aut 12-pela askim bilong Palamen-

tari Riferel Komiti we i tok long Edukesen i mas gat 12-pela toktok bilong sevis long kamapim senis na strongim wok bilong tisa long kantri.

"Plen nau i bilong lukim Tisa Sevis Komisen i wok hat long karimaut ol toktok i stap insait long plen na ol askim bilong Palamentari Riferel Komiti bilong Edukesen," Sori i tok.

Long wankain taim em mi tok mani bilong Plen em Gavman bai redi mani bilong em long olgeta ya.

Bilum Buk holim woksop long Trobriand Ailan



Bilum Books Dairekta, Ray O'Farrell wantaim ol tisa long Kitava Praimeri Skul. Ol tisa i bin stap long Bilum Books woksop bilong nupela Standet Bes Silabas bilong Elementri.

MILEN Be Provins i holim moa tisa insevis woksop bilong Bilum Buk long ol skul we i stap longwe tru long taun long ol ailan olsem Woodlark, Gawa na Kitava Ailan.

Ol Bilum Books tim i raun long ol bot namel long ol ailan na holim tupela de woksop we MBP Divsen bilong Edukesen i bin go pas long redim.

Joseph Tau, SPA Besik Edukesen i tok kliia olsem, "Edukdesen Divsen i yusim ol mani bilong provins long baim ol risos long helpim ol tisa long ranim ol nupela Standet Bes Inglis Elementeri Silabas. Tasol pastaim long ol tisa i kisim ol buk, ol i mas save gut pastaim long wei bilong yusim ol dispela buk, olsem na tupela de woksop wantaim Bilum Books fasiliteta i mas kamap."

Long wankain taim Ray O'Farrell,

Dairekta na Pablisa bilong Bilum Books i tok, "Mipela i redi long go long wanem kain hap singaut i kam. Wok misin bilong mipela em long bringim tisa trening i go daun long grasrut stret we ol skul husat i laikim ol buk bilong mipela i stap long en. Long ol distrik na skul klasta husat i baim ol buk bilong mipela, mipela i givim tisa trening nating na ol i no baim. Mipela i mekim olsem bikos mipela i gat bikpela tingting long kamapim gut mak bilong literesi."

"Ol level bilong literesi i mas kamap gut stat long daunbilo stret. Elementeri Skul em i as tru bilong skul. Dispela nupela silabas em i gutpela silabas tasol ol tisa i mas kisim trening na ol i mas gat ol rait rios long mekim wok gut. Sapos mipela i kirapim gut faundesen o as bilong literesi, ol tisa bilong Gret 3 na i

go antap i ken sanap antap long dispela na apim mak bilong literesi i go moa," Mista O'Farrell i tok.

Ripot bilong literesi long Pasifik i soim PNG i stap daunbilo olgeta olsem na ol hevi na hatwok i stap long ranim ol woksop i mekim yumi luksave long ol kain hevi i stap long ol skul we i stap longwe tru long taun.

I gat ol hevi bilong rot olsem haia long bot, lodim ol buk bilong ol lain bai kisim trening, baim fiul bilong ol dingi long bringim ol tisa bilong ol liklik ailan i kam, disel bilong skul jenereta, kaikai bilong ol lain i kisim skul na tu ol bikpela ren na bikpela solwara tu tasol dispela i no mekim ol fasiliteta na ol tisa i surik.

Bilum Books i stap mak wantaim nupela Silabas na ol pablisa i save ranim ol fri woksop long soim ol tisa wei bilong yusim ol buk bilong ol.

Kuman amamas long wok bilong em

MINISTA bilong Edukesen na Memba bilong Gumune Nick Kuman i tok em i amamas long taim em i bin stap Minista.

Wanpela bikpela polisi i sapotim na i wok long kamap gut em tuisen fi fri (TFF) polisi.

Em i tok dispela polisi i lukim planti mangi i go long skul.

Em i tok 2010 i gat 9543 elementari na praimer skul i stap tasol dispela numba i go antap long 12,330 long 2016 na dispela em 5.7 pesen gro.

Em i tok taim namba bilong ol skul i go antap, namba bilong ol sumatin we i stap long 4.6 pesen long 2010 i go antap long 6 pesen long 2016.

Long wankain taim namba bilong ol sekendari na vokesinel skul i stap long 9.1 pesen i go antap long 12.8 pesen. Namba bilong ol sumatin tu i go bikpela long 5.7 pesen long dispela taim.

Tasol Kuman i tok bikpela wari bilong em long Edukesen sistem i stap long mak we em i lusim sampela mangi long Gred 8 na sampela long taim ol i pinisim Gred 10.

Em i tok dispela i mas senis we olgeta mangi i mas skul go inap long ol i pinisim Gred 12.

Narapela samting Minista i laik lukim em Dipatmen i mas kamapim gutpela databes sistem peim TFF mani i go gut long ol skul

Wantaim dispela sistem i mas soim rekod bilong hamas skul i stap, we wan wan skul i stap, adres bi-



MINISTA bilong Edukesen na Memba bilong Gumune Nick Kuman.

long ol, namba bilong ol sumatin skul i gat long em, namba bilong ol gred, namba bilong ol tisa na level bilong skul.

Bikpela mak Kuman i tok em i mekim em long rausim na pinisim bilong autkam bes edukesen (OBE) na senisim wantaim standet bes edukesen (SBE).

"Mi salensi Dipatmen long em i mas go het long strongim standet bes edukesen we long 2020 dispela sistem bai strongim olgeta we ol sumatin i ken stat skul long elementari na pinis long Gred 12," em i tok.

"Mi askim tu long Dipatmen i mas kamapim moa teksbuk bilong tisim Inglis, Meths na Saiens.

"Las 10 i go long 15 krismas dispela i no bin kamap na planti sumatin i abrusim gutpela skul."

"Mi askim tu long Dipatmen i mas kamapim tu ol save we ol mangi taim ol i skul i gat save bilong wok mekanik, kapenta, didiman, kuk na samap," em i tok.

Gerehu Jeneral Haus Sik i gat nupela CEO

NUPELA Sif Eksektiv Opisa bilong Gerehu Jeneral Haus sik i wokim singaut i go long ol bisnis haus na ol narapela ogenaesen long helpim nupela Jeneral haus sik.

Dokta Steven Yennie i mekim singaut bihain tasol long ol i makim em olsem namba wan ekt-ing CEO bilong Gerehu Jeneral Haus sik long Mande dispela wik. Em i kisim dispela posisen bihain long nupela bod bilong Helt wantaim siaman bilong en, Peter Del Monte i kisim opis.

Dokta Yennie i tok i gat planti wok i kamap pinis stat long las yia i kam tasol i gat planti moa wok we ol i mas kamapim long haus sik bai kisim mak tru bilong en olsem wanpela Jeneral Haus sik.

Em i bin stap olsem menesa bi-

long Gerehu Haus sik pastaim long Minista bilong Helt na HIV/AIDS, Michael Malabag i tokaut long em i kamap Ekting CEO bilong haus sik.

Dokta Yennie i tok nupela jeneral haus sik nau i gat 320 wokman na wokmeri we namel long ol i gat ol speselis dokta, ol medikal opisa, ol helt ektensen opisa na ol sapot wokman na meri. Tasol dispela haus sik i mas gat 375 helt wokman na wokmeri.

“Mipela i nidim moa wokman. Mipela i mas baim moa ikwipmen bilong wok long em bai kamap tru long mak bilong Jeneral haus sik,” Dokta Yennie i tok.

Dokta Yennie i tok ol bai adve-taisim ol posisen na em i bilip olsem ol bai kisim ol man na meri bilong wok pastaim long yia i pinis.

Spesel Dokta bilong intenel marasin s i tok Gerehu haus sik i tok ol i save lukim samting olsem 270,000 sik lain long wan wan yia.

“Mipela i save lukim olgeta pipel bikos mipela em i wanpela riferel haus sik.

Mipela i save helpim ol sikman na sikmeri na ol lain husat bai go long bikpela haus long Pot Mosbi Jeneral Haus Sik em mipela i save salim ol i go, tasol moa pipel em mipela i save helpim ol long hia tasol na salim ol i go bek,” em i tok.

Em i tok olsem taim nupela Gerehu Jeneral Haus sik i kamap long Gerehu Stes 2, dispela haus sik nau i stap bai kamap wanpela distrik haus sik long Nesenel Kepital Distrik.



Nupela Sif Eksektiv Opisa bilong Gerehu Jeneral Haus sik. Dokta Steven Yennie, em i bilong Wes Nu Briten. Foto: Maureen Girawa

Embeseada Ebert-Gray lukim ol pikinini long haus sik

EMBESEDA Catherine Ebert-Gray bilong Yunaitet Stet Embesi long Pot Mosbi i bin go lukluk raun long Pediatrics Wod o Wod bilong ol Pikinini long Pot Mosbi Jeneral Haus sik long Fonde Epril 6 long makim Wol Helt De.

Embeseada Ebert-Gray i givim ol klos long ol sik pikinini i kam long ol Hogen Lovells, wanpela bikpela U.S lo kampani long wol. Dispela donesen em i wanpela samting we US Embesi i laik mekim olsem komyuniti kontribusen bilong en.

“Spirit bilong gutpela pasin bilong givim samting em i pasin we mipela long Yunaitet Stets i gat bikpela amamas long mekim,” Embeseada Catherine Ebert-Gray i tok. “Taim i gat ol pipel husat i gat



U.S. Embeseada Catherine Ebert-Gray i toktok wantaim tupela UPNG Medidal Fekalti sumatin (MBBS IV) long wanem wok ol i mekim insait long Wod bilong ol sik pikinini. Foto: US Embesi.

nid i stap, ol pipel bilong Amerika i save kirap na helpim. Dispela em i presen i kam long ol pipel bilong Hogan Lovells na em i wanpela liklik eksampel tasol bilong gutpela pasin bilong ol Amerika,” em i tok.

Embeseada Catherine Ebert-Gray i tok tenkyu long Traibel Faundesen long helpim bilong ol long bringim ol dispela klos i kam long Washington D.C.

U.S. Gavman i bungim han wantaim Nesenel Dipatmen ov Helt long strongim helt bilong ol Papua Niugini long kamap gut wantaim wok bilong U.S Ejensi bilong intenesenel Developmen (USAID) na Senta bilong Disis Kontrol (CDC) na Privensen hia long Papua Niugini.

Sampela helt wok we U.S Embesi i save helpim wantaim em olsem: Wok wantaim ol patna long stopim sik Tubekulosis. Klostu long 1800 sikman na meri husat i gat sain bilong sik TB bai kisim ol tes wantaim tupela GeneXpert masin we USAID i donetim long PNG Gavman las yia, long wokim gut ol tes bilong Multi-Drug Resistant - Tuberculosis (MDR-TB); ol i wok tu long strongim HIV/AIDS privensen na testing sevis na tritmen bilong ol pablik na ol ki populesen; helpim gavman long ol wok bilong daunim sevikal kensa na long kirapim moa awenes bilong ol jenda bes vailens long Papua Niugini we i save helpim hevi bilong HIV/AIDS i go moa.

Gerehu Jeneral Haus sik i gat nupela bod

GEREHU Distrik haus sik nau i kamap Jeneral Haus sik na em i gat wanpela haus sik bod ov dairekta bilong em yet.

Minista bilong Helt na HIV/AIDS Michael Malabag i tokaut long dispela wik na long wankain taim tu ol i makim ol nupela memba bilong bod long lukautim ol wok bilong haus sik. Long wankain taim ol dispela nupela bod memba i wokim tok promis bilong ol long stap olsem bod bilong haus sik.

Mista Malabag i tok olsem Gerehu

helt fasiliti i bin bungim planti hevi, tasol em i bin inap long sevim laip bilong planti pipel.

Olsem wanpela pablik haus sik, em bai gat bod bilong em yet. Siaman bilong Gerehu Jeneral haus sik em Peter Del Monte, wanpela bisnis man. Namba tu bilong em i narapela bisnis man Sanjay Gosali. Ol narapela bod memba em Dokta Goa Tau, i makim Dipatmen ov Helt, Paulus Leveli wanpela lokal bisnis man i makim bisnis sekta, Reveren Vaburi Dadaba i makim ol

lotu insait long distrik, Stanley Lapa i makim haus sik wokman na wokmeri, Kem Hesingut, i makim ol meri, Kupulu Garner Mera na Mato Posu i makim Lokal komyuniti.

Tok promis seremoni bilong nupela bod i bin kamap pastaim na bihain ol i holim namba wan miting bilong bod we ol i makim Dokta Steven Steven Yennie bilong Wes Nu Briten i kamap olsem Sif Eksektiv Opisa (CEO) bilong haus sik long sotpela taim olsem tripela mun tasol.

Helt na HIV/AIDS Minista Michael Malabag na Siaman bilong nupela Gerehu Jeneral Haus sik bod, Peter Del Monte i go pas long ol bod memba i go insait long haus sik graun long mekim tok promis.

Foto: Maureen Girawa



Peter Del Monte, siaman bilong bod bilong Gerehu Jeneral Haus sik i sindaun wantaim ol arapela deleet long taim bilong tok promis.

Emma Morano, i winim 117 krismas na em i dai

Emma Morano, bilong noten Itali i brukim wol rekot long stap longpela taim tru long graun.

Em i winim 117 krismas olgeta na em i wanpela bilong ol 5-pela pipel husat i stap longpela taim tru long graun. Mama i bin karim em long 1899 na em i stap laip inap tripela senturi.

Dokta bilong em Carlo Bava i tok em i bin ringim ol lain i save lukautim Morano long sekap long em na ol i tok em i bin dai long Sarere apinun long taim em i sindaun long sia long haus bilong em long Verbania long Lake Maggiore.

Dokta Bava i bin go lukim Morano long Fraide, na em i toktok wantaim dokta na holim han bilong em. Dokta i tok: "Em i tok tenkyu na holim han bilong mi."

Laip bilong Morano i bin stat long 29 Novemba 1899. Em i wanpla bilong ol 8-pela pikinini bilong tupela marit bilong ples Civiasco long Piedmont rijon long noten Itali. Long dispela yia tu, Guglielmo Marconi i bin

salim namba wan redio signal kalapim solwara long English Channel na 4-pela yia bihain ol foapela Wright brata i flai long balus, namba wan taim tru.

Em i stap laip long tupela wol woa na i lukim 90 gavan bilong Itali.

Long las betde bilong em, i bin gat pati na konset i stori long laip bilong em long taim bilong Namba wan Wol Woa na Namba Tu Wol Woa.

Em i bin wok long faktori we ol i save samapim ol beg na long taim em i bin lusiman bilong em husat i no save mekim gut long em. Long dispela taim ol komyuniti i no save sapotim ol meri husat i lusiman bilong ol.

Em i tok em i stap longpela taim bikos em i lusiman bilong em long 1938 bihain long wanpela pikinini bilong em tasol i bin dai long taim em i gat 7-pela mun tasol.

Em i tok narapela as bilong longpela laip em olgeta de em i save kaikai tupela kiau i no tan yet na liklik mins mit i no tan. Long taim em i gat 20 krismas dokta i bin tokim em

olsem em i sot long blut na i mas kaikai dispela kain kaikai bai helpim bodi bilong em.

Bava, husat i bin dokta bilong em inap 27 yia, i tok Morano i no save kaikai tumas ol saiyo na prut. "Long namba wan taim mi bungim em, Morano i save kaikai tripela kiau long wanpela de. Em i kaikai tupela kiau i no tan long moning na long belo em i kaikai skrambel kiau na long nait em i kaikai kakaruk."

Inap planti yia, em i bin wok olsem kuk long wanpela boding skul inap em i ritai long taim em i gat 75 krismas. Em i no marit gen na i stap singel inap em i dai. Bihain long ol wan lain bilong em i dai na tupela ai na yau bilong em i bagarap, em i no save raun tumas.

Tasol Rosi Santoni, wanpela bilong ol famili husat i save lukautim em i tok olsem las yia planti ol famili lain i bin helpim long lukautim em na ol pren long taun tu i kam lukim em.

Morano i kisim luksave bilong winim planti yia tru long

stap laip, bihain long meri husat i bin holim dispela rekot, Susannah Mushatt Jones i bin dai long Nu Yok long mun Me las yia.

I gat ol arapela memba bilong famili bilong em tu husat i bin stap laip inap planti yia tru. Mama bilong em, wanpela anti na sampela bratasusa i stap laip inap moa long 90 yia. Wanpela susa bilong em, Angela Morano i bin dai long taim em i bin gat 102 krismas. Morano i winim dispela mak long Itali na Yurop.



Ol i kisim dispela poto bilong Emma Morano, long Me 2016.

Meri Jamaica i gat 117 krismas i stap laip longpela taim

WANPELA meri Jamaica husat i gat 117 i holim rekot olsem em i stap longpela taim tru long graun bihain long Emma Morano, bilong Itali i bin dai long Sarere.

Ripot i kam long Gerontology Research Group i tok, Violet Brown, wanpela meri Jamaica husat i gat 117 krismas i holim dispela

rekot nau. Namba tu na namba tri em tupela meri Japan, Nabi Tajima na Chiyo Miyako. Mama i bin karim wanpela long 4 Ogas 1900 na narapela em long 2 Me 1901.

Wanpla meri bilong kantri Spen, Ana Vela, i gat 115 krismas na mama i bin karim em long 29 Oktoba 1901, em i winim mak long Yurop na i namba 4 long wol.

Las yia Vela i ritai long wok bilong samapim ol klos na i winim mak olsem em i stap laip longpela taim tru long Spen. Em i save stap long haus bilong ol lapun long Barcelona na i save sindaun long wilsia na i no inap toktok moa wantaim ol famili bilong em o ol lain i lukautim em.

El País i tok pikinini meri bilong em Ana, i gat 89 krismas na nau em i gat i no inap long go lukim mama bilong em olgeta de bikos

em i gat hevi long helt bilong em nau. Tasol tumabuna bilong em Antonio, husat i gat 65 krismas i save go lukim em oltaim.

"Oltaim mi save ting tumabuna meri bilong mi bai stap longpela taim tru bikos em i stap gu long taim em i winim 100 krismas," em i tokim niuspepa. "Mi save olsem wanpela de em bai winim rekot long Spen tasol mi no ting em bai winim dispela mak long Yurop,"

Las yia, long taim pikinini meri bilong Vela i toktok wantaim niuspepa, em i tok i no gat wanpela hait samting long longpela laip bilong mama bilong em. "Em i save laim wanpela glas wain i swit liklik wantaim kaikai bilong em, tasol em i no save dring planti. Em i save kaikai olgeta samting, mit, pis na ol saiyo. Kaikai bilong em i nomal – kukim kaikai long haus tasol."



Violet Brown i kisim ples bihain long Emma Morano, bilong Itali i dai long taim em i gat 117 krismas.

Gavana Jeneral bilong PNG opim namba 11 CPL Praid ov PNG

GAVANA Jeneral Bob Dadae, husat i petron bilong CPL Praid ov PNG Awod i opim CPL Praid ov PNG awod bilong ol meri long Mande 10 Epril long Waigani Sentral, Pot Mosbi.

Long dispela taim Embeseda bilong Yunaitet Stet long PNG, Embeseda Catherine Ebert-Gray i bin stap wantaim meri bilong Praim Minista, Linda Babao O'Neill, bikpela bos bilong CPL, Mahesh Patel na ol tim bilong CPL wantaim tu ol Praid ov PNG wina bilong bipo na nau.

Gavana Jeneral Bob Dadae i tok dispela em i namba 11 taim long CPL i lonsim na ogenaisim ol dispela Awod tasol long em yet em i namba wan taim long opim dispela kain gutpela wok na em i wantaim meri bilong em i amamas tru long stap insait long dispela bung.

"Olsem mi tok pinis yumi olgeta i gat wok long mekim long lukim kantri i yusim olgeta strong na save long



Gavana Jeneral Bob Dadae i toktok long ol lain i kamap long lonsim bilong CPL 11 Praid ov PNG Awod long las wik.

helpim ol meri long kantri bilong yumi; na olsem pas-taim Jeneral Seketeri bilong Yunaitet Nesen Kofi Anan i tok wanpela taim, "Jenda ikwaliti em i winim mak bilong em yet. Em i mas go pas long daunim poveti, strongim sastenebel divelopmen na kamapim gutpela gavanens." Em i tok.

Em i tok, em i ting olsem dispela ol Awod em bilong tok tenkyu long ol meri husat i givim laip bilong ol long helpim ol narapela insait long 10-pela yia i go pinis.

"Mi laik harim sampela moa ol kain gutpela wok long kamap. Ol kain laip bilong lusim tingting long laip

bilong ol yet na tingim narapela," em i tok.

"Mipela i laki long gat ol kain meri olsem long ol komyuniti bilong yumi long helpim yupela yet na ol famili bilong yupela, ol taun, setelmen na long strongim laip bilong yupela yet. Yupela i pait long ol pikinini bilong bihain i ken gat gutpela sindaun long bihain. Yupela i stap olsem lait long sti-aim mipela olgeta long mekim wok bilong strongim olgeta meri long Papua Niugini.

CPL i stat nau long painim 6-pela narapela meri long kisim ol awod long 6-pela kategori. Gavana Jeneral Dadae i mekim luksave long Siti Famesi Limited Grup long sapotim ol patna bilong dispela gutpela wok bilong luksave long ol meri i wok wantaim praid na digniti wantaim tingting bilnog ol narapela susa bilog ol husat i wok long hatwok long wankain samting tasol.



The Giluwa Mius

To contribute to this page, contact MY Media & News Agency on mobile: 70747450

Gabriel Andandi: Yumi mas kirapim moa save manmeri insait long Tambul-Neblyer

TAMBUL-NEBLYER elektoret insait long Westen Hailans i no gat ol bikipela risos olsem gol, kopa, oil, na kopi. Tasol distrik i save kamapim ol kumul olsem kapis, brokli, kerot na ol narapela.

Tasol dispela i nau i gat bikipela salens bilong wanem ol narapela distrik insait long WHP na PNG tu i kamapim ol bikipela kumu projek. Taim ol Tambul-Neblyer i save kisim ol kumu i go long Mt Hagen maket, spes save pulap na ol no gat bikipela spes long maket.

Na bipo tu, planti ol manmeri long Tambul-Neblyer i save go wok long ol plantasin kopi, ti, kopra na ol narapela kakaboi wok bilong ol narapela man. Olsem na planti ol papamama long Tambul-Neblyer i laik salim ol pikinini bilong ol i go long bikipela skul long ol i mas no ken kamap ol kakaboi.

Tasol planti papamama i hatwok yet baim skul fi bilong ol pikinini bikos ol i no wok mani na tu i no gat gutpela wei long kamapim inap mani long baim ol bikipela skul fi.

Gabriel Andandi em wanpela bisnisman long Lowa Kagul distrik, Westen Hailans Provins na em i luksave olsem edukesen tasol i ken senesim Tambul/Neblyer ilektoret na kantri. Gabriel i bin wok wantaim Unaited Nesen (UN). Moa long 15-pela krismas, Gabriel lusim UN na kamap bisnis man na helpim ol lain long ples. Bipo em wanpela tisa na i gat mastas digri long Australia.

Wanpela bikipela helpim em i kamapim insait long Tambul-Neblyer ilektoret em long baim skul fi bilong olgeta sumatin long Tambul-Neblyer long kisim wankain save olsem em o i ken winim em na kamap gutpela save man na meri insait long ilektoret na kantri.

Long 1997, Gabriel i bin helpim ol sumatin long skul fi na moa long 1,000 sumatin i bin kisim helpim pinis. Ol dispela lain tude i wokim ol bikipela wok insait long kantri o i skul long ol bikipela koles na yuni-vesiti.

Gabriel i luksave olsem Tambul-Neblyer ilektrot em no gat risos na em i gat bel sori long helpim ol papamama husat laikim ol pikinini bilong ol i kisim bikipela skul.



Mista Andandi (namel frant row) wantaim ol PNG sumatin stadi long Manila, Philippines we em i peim skul fi bilong ol.



Mista Andandi

Taim Gabriel i luksave olsem helpim bilong em i senisim planti pikinini long las 20-pela krismas, em i bin skruim wok helpim i go bikipela na long Sande Februari 19, 2017 i lonsim "Tambul-Neblyer Students School Fee Initiative" program.

Gabriel em i no wankain olsem ol memba bilong palimen we i save karim sek moni na kes moni i go raun na baim ol skulfi tasol tingting bilong em i bin kamap long 1997 taim em i luksave olsem ol Tambul-Neblyer sumatin i mas kisim bikipela save na painim wok long olgeta hap long wol.

"Mi bin helpim moa long 1000 sumatin stat long 1997 na tude ol i holim ol bikipela wok olsem dokta, loya, akaunten, na ol narapela wok," Gabriel i tok.

"Dispela yia mi laik helpim mak long 500 sumatin. Mi bin basetim hap milion Kina (K0.5mil) long baim skul fi bilong ol," Mista Andandi i tok.

Long stat bilong dispela yia, Mista Andandi i bin mekim ol ran i go ista olgeta bikipela skul insait long kantri na baim skul fi bilong ol Tambul-Neblyer sumatin.

Long Sande Februari 19, em i bin bungim moa long 60 sumatin bilong Tambul-Neblyer long Madang olsem Divain Wot Univesiti, Madang Tisa Koles, Teknikol Koles, Nesing Koles na ol narapela skul we em i pem moa long K50,000.

Long Februari, em i bungim 60-pela sumatin long Goroka na baim moa long K50,000 skulfi bilong ol.

Moa long 150-pela Tambul-Neblyer sumatin long Lae em Gabriel i bungim long Balop Tisa koles na baim moa long K90,000 fi. Em ol sumatin long Lae Teck, Lae Politek, Balop Tisa Koles na ol narapela bikipela koles.

Long Mas 19, Gabriel i bungim moa long 20 sumatin long Kokopo na baim moa long K20,000. Em bin go long Kaindi long Wewak, Simbu na pinis long Hagen.

Gabriel i helpim tu ol sumatin long UPNG, Pacific Adventis Yuni-vesiti na narapela skul insait long Pot Mosbi, Manila, Philippines na China wantaim moa long K1000,000.

Long Mas 4, Gabriel i bin go long Manila na bungim moa long 15 sumatin bilong Tambul-Neblyer na ol narapela distrik na baim moa long K20,000 tuisen fi.

"Philomina Philipo em bilong lalibu long SHP na skul long China tasol mi bin helpim em bipo yet. Mi laik kamapim human risos bilong PNG na Tambul-Neblyer wantaim," Mista Andandi i tok.

"Mi bilong SHP na skul long China long Wuhan Univesiti na tok tenkyu long Gabriel lo helpim mi long skul fi," Philomina i tok.

Narapela sumatin meri long

Batangas State University long Manila, Kimberly Yakumb i stadi long Petroleum Engineering na i salim wanpela email na tok tenkyu long Gabriel long sapotim long skul fi.

Hatwok long bisnis bilong em we i wokim liklik profit, Gabriel i save helpim ol sumatin na ol papamama we i no gat wei long painim skul fi mani na Gabriel i basetim half million Kina long sapotim ol sumatin dispela yia.

Moses Pangimi, kaunsila na lidaman bilong Poika Tribe insait long WHP tok tenkyu long Gabriel Andandi long sapotim ol sumatin.

"Mi makim maus bilong olgeta papamama bilong ol sumatin na tok bikipela tenkyu long God i givim yu dispela wisdom long helpim ol pikinini bilong mipela. Dispela kain lidasip bilong yu em mipela nidim long Tambul-Neblyer," Kaunsila Pangimi i tok.

Presiden bilong Tambul-Neblyer sumatin long Goroka Yunivesiti, Johnny Kaile i tok moa long 60 sumatin i amamas stret long Gabriel Andandi i baim skul fi bilong ol.

"Ol papamama bilong mipela i no wok mani na hat stret long kisim mani tasol dispela bel na helpim Gabriel i givim em mipela painim hat stret long tok tenkyu. God bai blesim em,"

"Nogat wanpela man i ken mekim olsem long mipela. Planti ol narapela sumatin em ol memba bi-

long ol i save baim skul fi na mipela Tambul-Neblyer em no gat stret inap Gabriel i helpim mipela stat long 1997," Johnny i tok.

Olgeta sumatin bilong Tambul-Neblyer insait long kantri na ovasis i salim bikipela tok tenkyu long Gabriel Andandi long helpim olgeta pikinini Tambul-Neblyer i mas kisim gutpla edukesin.

"Mi lukluk long ai bilong ol dispela yangpela sumatin na askim mi yet; 'wanem samting stret i ken stopim ol dispela sumatin long kisim gutpela edukesin?' Long pes bilong ol na lewa bilong ol em mi lukim ol i gat bikipela diriman long kamap gutpela sitiseni. Na mi gat bel isi long helpim ol," Mista Andandi i tok.

Mista Andandi i tok sapos em i laik lusim bihain hanmak bilong em long distrik, provins na kantri bai em i laik long lukim ol sumatin bilong Tambul-Neblyer i mas kamap bikipela save man na meri na ol i ken bihain kamapim gutpela sindaun we i gat peace wantaim lo na oda.

"Buk Baibel i tok yumi mas laikim narapela man na meri. Mama lo bilong PNG i tok olgeta manmeri i mas kamap wankain na pasin rispek na luksave i mas stap. helpim bilong mi em i sanap antap long dispela ol as tingting long lukim ol yangpela bilong tude i mas gat gutpela laip tumoro," Gabriel i tok.



NORMAN FINANCE LIMITED
Financial Solution Providers for a better future

Norman Finance Limited

P.O. Box 891, Waigani, National Capital District

Phone: (675) 326 3281, Fax: (675) 326 3281

Email: gandandi@hotmail.com



GST#
18351

Interest rates are reasonable:

We offer

Low Interest Rates

Efficient Services

No Service Fees

No Default Fees

No Processing Fees

Rebate on Early Settlement

Service within 36 Hours

A Subsidiary of Universal Service Limited

Gutpela na nogut bilong ol refuji i stap long PNG

TUPELA wik i go pinis, nesanel gavman i bin givim PNG sitisensip i go long moa long 1,000 refuji bilong Wes Papua husat i stap nau long Is Awin, Westen Provins.

Ol dispela pipel i bin stap hia olsem ol refuji inap planti yia tru na ol i gat ol pikinini na ol tum-buna tu. Sampela bilong ol i dai pinis na sampela i marit long PNG na ol i stap olsem ol asples. Tasol ol i bin karim dispela bikpela hevi tru we ol i olsem ol pipel i hangamap nating, i no gat nem na i no gat sans long muv raun long ol arapela hap bilong PNG o i go long ol ovasis kantri tu.

Bai i gat moa seremoni bilong givim PNG sitisensip i go long ol refuji bilong Wes Papua husat i stap long ol narapela hap bilong kantri. Gavman i mekim olsem long bihainim promis em i bin mekim sampela yia i go pinis long ol refuji bilong Wes Papua.

Nesanel gavman i bin givim sans long ol dispela pipel i kamap ol sitisen bilong Papua Niugini sapos ol i laik. Dispela pasin gavman i mekim long larim ol kamap sitisen, i winim ol pasin bilong ol arapela gavman bipo. Ol gavman bipo i bin save olsem i gat ol refuji i stap long PNG tasol gavman i save pret long Indonesia olsem na i no laik wokim disisen long sindaun bilong ol dispela lain.

Gavman i givim dispela wok i go long han bilong UNHCR long



Ol refuji bilong narapela kantri...

lukautim ol dispela refuji na i traim long lusim ting long ol. Planti bilong ol i save kisim helpim long han bilong ol Kristen sios na ol i stap. Tasol tude, planti yia bihain, Praim Minista Peter O'Neill na gavman bilong em i tok orait long ol i ken stap long PNG olsem sitisen bilong kantri. Planti bilong ol lapun i bin krai bikos ol i no ting bai ol i lukim dispela promis bilong PNG gavman i karim kaikai.

Long 1964 samting namba wan

lain refuji bilong Wes Papua i bin kalapim boda na kam insait long PNG. Gavman bilong Australia long dispela taim i bin salim ol i go long Imonda long Wes Sepik na sampela i go long Manus. Bihain long 1980 samting, taim ol lain OPM i bin strong long pait egen-sim Indonesia long boda eria, planti moa pipel i bin kalapim boda na kam insait long PNG. Sampela i sindaun long Wara Ston ausait long Vanimo na ol narapela

em gavman i salim i go stap long Is Awin.

Planti bilong ol dispela lain i bin wanbel long go bek long ples bilong ol taim gavman bilong Indonesia i statim program long kisim ol i go bek. Ol narapela lain i go stap long Holan na sampela i go long Vanuatu.

Ol pikinini na tumbuna bilong ol dispela lain Wes Papua husat i refuji long Papua Niugini, i mekim bikpela kontribusen tru long divel-

opmen bilong Papua Niugini. Sampela i kamap dokta, loya, tisa, ol nes, ensinia na ol senia pablik sevan. Ol arapela i mekim bikpela wok tu long ol sios na ol praivet kampani long kantri. Olsem na i gutpela gavman i tok orait long ol i stap olgeta long PNG na kamap sitisen.

Hevi bilong ol lain Wes Papua i no pinis yet. Ol i kisim pepa i soim olsem ol i sitisen bilong Papua Niugini nau, tasol i gat planti salens moa i stap. Ol i ken soim tenkyu bilong ol long skruim yet ol gutpela wok ol i mekim nau long helpim kantri bilong yumi, Papua Niugini.

Dispela gutpela stori bilong ol refuji long Wes Papua i mekim ol pipel i amamas. Tasol long las wik moa trabel i kamap gen long Manus ditensen senta we gavman bilong Australia i tromoi ol refuji i stap nating nau. Kot bilong PNG itok ol i no ken stap olsem ol kalabus. Ol i fri long wokabout raun long Lorengau taun na i gat planti komplek i kamap pinis long ol hevi dispela lain i kamapim.

Ating nau i taim bilong nesanel gavman long tokim stret Australia long helpim na painim narapela kantri long salim ol dispela lain i go stap, o salim ol i go bek long asples bilong ol sapos ol i no laik stap long PNG. Yumi no ken pasim maus tasol bikos planti hevi i kamap pinis long dispela refuji senta long Manus.

PNG laikim gutpela lidaman

STAP bilong komyuniti, sapos em i gutpela o nogat i bihainim kain lida em i gat.

We ol manmeri i amamas i soim i gat gutpela lida na we ol manmeri i stap wantaim bel hevi i soim lidaman i no gutpela (Buk Saveman 29:2).

Dispela tok i tru long ol komyuniti long Papua Niugini na long taim kantri i stat long go insait long wok bilong ileksen.

Lidaman em i olsem draiva bilong ka, sip o balus. Sapos em i draiv gut na abrusim ol ples nogut ol pasindia i sindaun gut na amamas. Sapos draiva i no gutpela ol pasindia long ka, sip o balus bai i no inap stap gut na stap wantaim wari.

Long kantri sampela lain i tok em i stap gut tasol i gat ol hevi i stap. I gat hevi bilong lo na oda, manmeri i no gat gutpela helt, no gat gutpela skul, no gat rot o gutpela rot na planti manmeri i no gat mani long poket bilong ol.



Bikpela siti Pot Mosbi na olgeta arapela siti na taun i wok long bagarap.

Moa yet prais bilong rais, tin pis, suga na ti i wok long go antap klostu olgeta wik o sapos no gat olgeta de.

Dispela long wanem Papua Niugini i gat bikpela hevi long mani.

Em i soim tu olsem kantri i nidim gutpela lida. I no long hetman bilong kantri tasol.

Dispela laikim i go tu long olgeta sekta bilong komyuniti.

Wok bilong lidaman i stap long famili i go inap long ol bikpela opis. Na manmeri i

lida ol yet tu. Stap bilong ol bai bihainim wanem ol disisen ol i mekim, ol gutpela disisen bai lukim ol i stap gut na amamas na ol disisen i no gutpela bai lukim ol stap wantaim hevi. Hevi long laip bilong wanpela yet, long famili, komyuniti na kantri wantaim i bihain kain disisen wanpela i mekim long laip.

Pasin bilong harim tok na rispek i gutpela pasin tu.

Lo bilong noken paitim meri.

Taim papa i sakim tok, dispela i lukim em i go long kalabus o mama i lusim papa na bekim bilong dispela i lukim famili i no gat man long lukautim famili. Pikinini i stap turangu.

Long komyuniti, Nesanel Kapitel Distrik Gavana Powes Parkop wantaim Komisen bilong em i tok long noken salim buai long pablik.

Dispela lo i kamap long mekim ples i klin na gutpela.

Tasol manmeri i sakim tok na salim buai long pablik ples

yet. Bekim bilong dispela sakim tok i lukim Pot Mosbi siti i luk deti, smel na i ken kamapim sik.

Long ol pablik opis, lo i tok long ol Mema bilong Palamen na ol gavman opisa i no ken paulim mani. Taim ol i brukim dispela loa bekim em mani i sot.

Mani i sot long gavman i no inap mekim rot, nogat haus-sik, skul, manmeri i no inap mekim maket o mekim bisnis na ol manmeri i nogat mani long strongim sindaun bilong ol.

Sampela taim tok bilong God i no go long ol. Bungim wantaim dispela hevi bai lukim sindaun bilong ol manmeri i no gutpela long bodi na spirit wantaim.

Olsem yumi tok gen, stap bilong gutpela lidaman i lukim wanpela, famili na komyuniti i sindaun gut wantaim bel isi. Taim lidaman i no gutpela, dispela bai lukim hevi i stap.

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

Tausen manmeri bihainim Rot bilong Kruse



Ol Kristen manmeri i bihainim Rot bilong Kruse na karim diwai kruse long Pot Mosbi. Foto: Paul Zuvani

Paul Zuvani i raitim

GUT Fraide long las wik i lukim moa long 30,000 manmeri bilong Katolik, Angliken wantaim ol arapela Kristen sios long Pot Mosbi i bihainim Rot bilong Kruse.

Ol i stat long Don Bosko Teknikel Institut, Is Boroko long 4 klok moning na go long Malaoro, Sabama, Kila Kila, Kaugere, Badili Mobil Stesin, Koki, Ela Bis, St Mary's Katedral, Konedobu, Friwe, Hohola, Bishop Brothers, Vision Siti, Kone Tigers, Waigani TST na pinis long Mary Kwin ov Pasifik sios long Waigani.

Ol manmeri i wokabaut pre

na singsing wantaim long tingim pen na dai bilong Jisas.

Long Waigani trefik lait long rot i go long Morata ol bilip manmeri bilong Santu Martin De Porres paris i kisim pre bilong Stesin 12 we i tok long Jisas i dai long diwai kros. Long dispela ol i tingim dai bilong Jisas long tumbuna pasin ol i waswas long graun long soim sori bilong ol. Ol i mekim pre na i mekim tumbuna sori singsing wantaim.

Stesin 13 na 14 long Waigani sios ol manmeri i soim pilai long taim ol Roman opisa i paitim Jisas, nilim em long diwai kros, kilim em na rausim em long diwai kros.

Long dispela wokabaut tu ol Koreksenel opisa long Bomana Haus Kalabus i larim sampela kalabus man i join long wokabaut na pre.

Wanpela bilong ol kalabus man i tok maski ol i bilong ol narapela narapela sios ol i bung wantaim long mekim wanpela samting, em pre na bungim wantaim long tingim pen na dai bilong Jisas.

Kardinal Sir John Ribat i pinisim wokabaut wantaim lotu.

Em i tok: "Wokabaut i longpela na dispela i soim bilip bilong ol i gat long em. Yupela i pre, singsing long tingim pen na dai bilong Jisas.

"Olgeta Kristen wantaim ol

arapela sios i bung wantaim Katolik na wokabaut na pre wantaim i gutpela.

"Mipela i tenkim God long dispela, long presen bilong laip, long pasin bilong laikim na long bel isi pasin.

"Dispela em i tok mipela i mekim long Bikpela na oltaim mipela i mas tingim na bihainim."

Wantaim dispela Kardinal Ribat i tok tu long Ilesken long dispela i wanpela rait ol manmeri i soim rait bilong ol.

"Dispela em i Konstitusinel rait long mipela i mas yusim long votim manmeri mipela i laikim," em i tok.

Em i askim ol manmeri long makim ol gutpela lida.

Arnold mekim sios wok olsem ol bikpela brata

James G. Kila i raitim

ARNOLD Buai em i wanpela liklik boi we i save amamas tru long mekim wok olsem ministran long Katolik pater long Holi Spirit katridral long Madang i wokim misa.

Arnold i bin soim kala na gutpela wok bilong em long Holi wik bilong Ista wantaim sampela ol wankul bilong em. Em i mekim wok ministran bihainim lek mak bilong ol brata bilong em Maclaren, Macqueen, na Macwayne.

Papa bilong Arnold, Charles Buai i tok olgeta ol dispela brata, Maclaren, Macqueen, Macwayne na Arnold i bin wok ministran long Holi Spirit haus lotu. Ol i kisim baptais wantaim fes holi komunio na konfemesen long dispela haus lotu tasol.

Arnold em i hap Manus na ls

Sepik na em i skul long Holi Spirit praimer skul long Madang taun. Dispela skul em i bikpela Katolik ejensi praimer skul i save kamapim planti gutpela sumatin na saveman insait long kantri.

Ol Buai famili save stap long Kalibobo Draiv na ol i strongpela Katolik famili husat i save stap oltaim long helpim wok bilong sios. Arnold em i kisim nem bilong wanpela pater pastaim long Holi Spirit haus lotu na dispela pater em bilong Bogia.

Papa Charles i tok olsem, taim ol pikinini i stat mekim Sios wok taim ol i liklik yet, em bai strongim Kristen pasin na bilip na tu ol pikinini bai rispek long papamama na harim tok na pret long mekim rong. Moa long en tu ol bai strongim Kristen bilip bilong ol long taim ol i bikpela.



Arnold Buai i wok ministran long Holi wik long Holi Spirit Katolik haus lotu long Madang. Foto: James G. Kila

Charles yet em wok olsem kepten bilong sip bilong Ramu NiCo (MCC) MV Carrie na em

save ran namel long Madang taun na Basamuk.

Ol Lutheran sumatin bung long Ista Kem

Jerry Daniels i raitim

NESENEL Lutheran Sumatin Ista Kem 2017 i bin kamap long Gabmazung Praimeri Skul klostu long Nadzab Ples Balus. Samting olsem 2,476 sumatin bilong 70 skul long olgeta hap bilong Papua Niugini i bin kamap.

Namba tu Het Bishop bilong ELCPNG Reveren Lucas Kedabing i bin opim dispela Ista kem long Fraide Epril 14. Kem i bin stat long Fonde Epril 12, na i go pinis long Sande 16, 2017.

Bikpela het tok bilong dispela kem em Liberated By Grace, na ol tripela liklik het tok em, Salvation not For Sale, Human Beings Not For Sale na Creation Not For Sale, Rom 1:16-17. Long dai na kirapim bek bilong Jisas Kraus God i rausim yumi long kalabus bilong sin, satan na dai na yumi i stap fri long mekim wok.

Dispela kain lotu bung em i wanpela taim we olgeta Lutheran sumatin na tisa long ol praimer na hai skul, yunivesiti, ol teknikel skul na ol arapela skul na koles long olgeta hap bilong kantri i save kam bung wantaim na stadi long Tok bilong God na amamas wantaim.

Gabmazung em i wanpela bilong ol Lutheran ejensi praimer skul i stap insait long Wampar Seket bilong ELC Yabim Distrik. Dispela em i namba wan taim long wanpela Lutheran praimer skul long go pas long Nesenel Lutheran Sumatin Ista Kemp olsem na olgeta manmeri long ol ples klostu olsem Gabsongkec na Gabensis na Wampar Seket i wanbel tru long lukautim dispela Ista kemp.

Ol man na meri, ol yanpela na pikinini bilong Wampar seket i givim bel tru long lukautim dispela kem wantaim ol tisa na sumatin bilong Gabmazung Praimeri Skul. Sampela tisa husat i bin stap long Gabmazung Praimeri Skul long las yia na ol i bin transfe i go long ol arapela skul i givim helpim i kam long Gabmazung praimer skul long sapotim dispela Ista kem tu.

Ol sumatin i bruk i go long tripela grup long ol Baibel Stadi, ol tesian sumatin, haiskul na ol praimer skul.

Insait long kem tu ol i redi long helpim ol sumatin long kaunseling sapos ol i gat kain kain askim long ol Baibel stadi i bin kamap long kem o long sampela hevi insait long laip bilong ol yet.

Sampela lain bikman i kamap em olsem Gavana Jeneral bilong Papua Niugini Bob Dadae na Gavana bilong Morobe Provins Kelly Naru na ol i givim sampela toktok long strongim ol sumatin.

Long Sande i bin i gat lotu long 5 klok moning taim i go 6 klok na bihain Ista Sande lotu i kamap long 9 klok moning i go pinis long 11 klok wantaim holi komunio.

Presiden bilong ELC Yabim Distrik, Reveren Yasam Aiwaru i bin pasim kem na ol i givim sil o emblem bilong hostim Nesenel Lutheran Ista Kem 2018 i go long ol sumatin bilong Madang.



Beon kalabus lain autim gutpela stori long Ista Sande

Ol lain kalabusman i singim song long bel bilong ol stret. Ol poto: James Geno Kila



Ol mama i givim kaikai long ol kalabus lain.

James Geno Kila i raitim

TAIM yu kam long save tru long Jisas Krai insait long banis kalabus bai yu save tru long wanem as tru bilong laip bilong yu long dispela graun.

Dispela em i wanpela strongpela toktok na salens em wanpela longtaim kalabusman i mekim long Ista Sande, long Marimari Luteran Sios long Mauban viles long Gum klostu long Madang distrik.

Dispela yangpela

man Emmanuel Ong nau i stap 30 yia bilong em long Beon haus kalabus bihain long kot i painim em i rong long kilim indai wanpela man. Emmanuel wantaim ol arapela lain kalabusman meri i bin go aut wantaim ol woda long lotu wantaim ol Kristen manmeri autsait kalabus na tu long autim Kristen ekspiriens bilong ol.

Emmanuel i tokaut olsem em i kisim blesing insait long banis kalabus yet na i onaim God, na i salensim ol yut long

senisim pasin na no ken bikhet na go kalabus.

Emmanuel i tokaut long testimoni o laip stori bilong em na em i givim strongpela salens long ol yangpela tude, husat i save mekim trabel na ting olsem ol i 'ain man o kapa man' na ting olsem taim ol kamapim hevi long laik na stail bilong ol yet, lo bai no inap holim pasim na kalabusim ol.

Em i salensim stret ol yangpela man bilong Amele eria husat save kolim ol yet 'Wali' olsem maski nau ol tok o soim olsem ol 'ain man' o 'kapa man' haus kalabus em narapela kain ples tru, we tingting bilong ol bai paol olgeta na ol ken bungim bikipela bel pen na wari na sori.

Dispela bung lotu em ol lain bilong Marimari Luteran Sios long Gum olsem

siaman yet Kulal Hoeg wantaim komiti bilong em na Beon CS Prison Felosip siaman, Martin Awek, Beon CS Komanda, Sif Inspekta, Kosia Ban na ol arapela i bin redim.

Planti ol lain i bin amamas na tu wari long harim ol testimoni we i salensim tru planti ol yut na ol pipel long traim moa long abrusim ol birua na stap gut insait long komyuniti na no ken mekim trabel na

go kalabus.

Wanpela kalabus meri bilong Simbu provins, Agnes i bin statim toktok we em i givim testimoni bilong em. Em i stori olsem taim em i stap long fridom o ausait long kalabus banis, em i no save tingim lotu o ritim Buk Baibel. Tasol taim em i go insait long banis kalabus em i no gat samting long wokim bikos em i stap kalabus olsem na em i givim taim bilong em long ritim baibel na dispela i helpim em long go klostu long Papa God. Dispela meri Agnes i kisim taim 8-pela yia kalabus.

Dispela autris bilong ol lain kalabusmanmeri bilong CS Beon i tokaut long laip bilong ol insait long banis long helpim ol yut long traim daunim bikhet pasin we i kamap long ausait.

Planti ol manmeri husat i bin bung long Marimari Luteran Sios long Sande i bin sore na wari taim ol i lukim na harim ol testimoni o stori ol lain kalabus manmeri i givim.

Long wankain taim tu long dispela Ista Sande lotu ol i bin dediketim Komanda bilong Beon CS haus kalabus, Sif Inspekta Kosia Ban, em Pasto Dora Yawa bilong Memoriel Luteran Sios long Madang i mekim.



Ol lain bilong Beon CS wantaim ol Kristen bilong Marimari Luteran kongrigesin long Gum.



Kalabus man Emmanuel Ong givim stori bilong em. Em i stap longpela taim long haus kalabus.

Oi poto bilong Rot bilong Kruse



Oi bilip manmeri i karim diwai kros bihainim Friwe.



Maria Liwa bilong Koroba, Hela tasol i stap long Morata i bihainim Rot bilong Kruse stat long Don Bosco Teknolojikal Institut i go ol-geta long St Marys Kwin bilong Pasifik sios long Waigani.



Oi manmeri bilong St Charles Lwanga peris long Gerehu i kisim Kruse long han bilong ol manmeri bilong St Michael peris, Hanuabada long Friwe.



Long soim sori bilong ol, bilip manmeri bilong St Martin Di Porres long Morata peris long namba 12 Stesin bilong Rot bilong Kruse, we Jisas i dai, i waswas long graun na pre.



Oi manmeri i karim diwai kros bihainim rot.

Yu ting wanem long Gren Sif Se Michael?

Wantok Niuspepa i kisim tingting bilong ol manmeri long strit bilong Madang long ol i ting wanem long Gren Sif Se Michael Somare, taim em i ritaia o lusim wok politik bihain long 49 yia. *Ol poto na stori - James G Kila*



Gren Sif Se Michael Somare.



JANET Tindipu, Hela Provins. Mi save lukim Gren Sif Sir Michael Somare olsem spesel man em Papa God yet i makim long bringim yumi PNG i go aut long kolonaisesin o stap olsem koloni bilong Australia. Sir Michael em olsem Moses long Buk Baibel we i bringim ol lain Israel pipel i go aut long Isip. Gren Sif Sir Michael em spesel man tru Papa God i makim long bringim PNG i kam kamap olsem tude. Olsem na mi sori na wari long Gren Sif Sir Michael i pinis long politik. God Papa bai blesim em.



TREVOR Kasane, Niu Ailan provins: Gren Sif Sir Michael Somare em biknem lida bilong kantri we olgeta kona bilong Papua Niugini i save long em. Em papa bilong kantri PNG na wanpela spesel ona i mas go long em.

DIKA WARI, Sentral provins: Gren Sif Sir Michael Somare em papa husat i kirapim Papua Niugini. Em i bringim planti samting na mekim rot long politikal na ekonomik developmen we PNG i wok long amamas wantaim tude. Sori tru olsem em bai go aut long politiks.



STEVE OPUR, Jiwaka provins. Gren Sif Sir Michael bai stap long histori bilong PNG olsem em i bringim PNG long kisim independens na mipela olgeta pipel mas soim bikpela rispekt long em. Em i go pas long kantri taim planti no save long rit na rait na em go het long sanap strong na bringim independens. Em mekim gutpela samting na mipela olgeta mas rispek na beten long em wantaim famili bilong em taim em i lusim politiks na stap wantaim famili.

ANNIE MAIDA, Madang provins. Mi sori olsem dispela longpela taim lida na papa bilong yumi PNG bai lusim wok politik. Gren Sif Sir Michael Somare em i gutpela wasman na lida we i stiaim ol yangpela lida long wok politik long kantri. Em trupela papa bilong PNG politik na nem bilong em bai stap longpela taim. Em brukim rekot long PNG politiks na tu long Komonwelt.



NICHOLAS WAIPUK, Westen Hailans: Gren Sif Sir Michael Somare em mekim histori long Komonwelt we ating no gat arapela ol lida bai mekim. Em i stap 49 yia olsem lida ol pipel i bilip long em na makim na dispela i soim tru olsem ol pipel bilong Is Sepik provins i mekim histori tu long Komonwelt.

Ol Yunit long Rainbow i stap long Rent!

I gat haus bilong rent i stap long Rainbow Estate

Seksen 506, Lot 60 na 61 – Word Publishing Kampani Kompaun.

Long Rainbow Estate nau i gat 5-pela tripela betrum haus i stap fri long rentim. I gat bikpela banis na sekyuriti geit na lait i stap.

Prais bilong rentim em K4,000 tasol long mun.

Planti mango diwai, plawa na planti gutpela klinpela win.

Plis ringim Buana Ragela o Elizabeth Konga long telepon namba 325 2500 long toksave.

STORI BILONG TUMBUNA

No gat saksak

B ipo tru long ples Pindup i gat sampela masalai i stap. Ol pipel yet i no gat saksak. Ol i save kaikai wel saksak na mami, yam, taro na Gamak tasol.

Wanpela taim tupela marit i kirap stret long Sepik na tupela i karim ol kru saksak. Na tupela i wok long planim ol saksak i kam antap. Tupela planim i kam kam kamap long ples Pindup. Taim tupela i laik kamap long Pindup tupela i singsing wantaim.

Nau masalai bilong Pindup i harim bikpela nois tru. Na em i laik lukluk. Man, tupela i no isi long singsing na planim ol saksak i kam. Na bel bilong em i hat. Em i kirap tasol na em i tok: "I no ken tru long kisim dispela rabis saksak i kam planim hia. Lip bilong en i save pairap planti na kaikai bilong en bai no save strong. Em rabis saksak tru, mi no laik yu planim ya. Dispela ples, em ples bilong

taro, yam, mami, gamak na suga. I no ken tru planim saksak long hia."

Na em i tok: "Karim rabis saksak bilong yu na go." Em i tok olsem na tupela i no skruim wok moa. Nogat! Tupela i tanim bek na ran i go

na brukim ston bilong lek na i go pinis.

Dispela mak bilong lek i stap yet, mipela save dring wara long dispela ol mak bilong lek. Na tupela karim ol-geta kru saksak i go bek tupela i planim long hap bi-

long Ramu na Sepik.


Olsem na long mipela no gat planti saksak. Long Ramu na Sepik tasol i gat moa saksak.

Martin Mugumat Madang




Em nau! Ol pikinini i ken painim rot i go long ples wantaim Wantok lain...

Stat hia



Yu pinis! Em ples bilong yu

Stat hia



Yu pinis! Em ples bilong yu

Ansa bilong Wod Pilai isu 2220

OGMHSREWYTESLDPPTSIGWC ONP
 ARESJRHAWHEKBFNICAHHEBNGQ
 RNRGRIDPYPRENCBANARAVSOIXK
 KMM EYOTBV AZAMRS SGIGALQFOES
 YZF PSTSXCHR SZJEEVSMOIXSTJ
 WEUTJDNSTBAEYNMRKSTSNMBFS
 MSEKRHKMNOYLGGEOMAVSGDXXA
 NIPCLOUNCBULITIMWUSCBFPR
 KL MRAP E EKSSJNM SR IOSKACRSL
 EUFETTNNZAHMAATZCEAOALYEE
 FAEXNIFHRMALIPRKLLSXQULEA
 DNBEAWKEKTDTAIOAEUITAPTEI
 OMLAMRBTSTOOTIMNWKKERFGMI
 WPHFDCVAEKVVASGAPAGTMSFSF
 ARAUTRKSTBNQATIWCUIPEUWPO
 HWDIMABEDADPFQMAVTINHEMKN
 RSWNLAWHGMSEFNRAFXLCCRSH
 FPEDOYENZYYIICTPTPB NJXHAK
 EJSRMKUARZTGESLOTEEHNERSW
 JSRLXVMI FGPVRCVPUEQE VETRO

PAINIM WOD PILAI

Ol wod lista:

- | | | |
|----------------|----------------|---------------|
| AILA | LAIP | LAIM |
| DRO | PAPA | MANKI |
| KAMDAUN | EM (8) | KAMAP |
| PANKEK | AUT | BANANA |
| BRIK | RAN (2) | GAT |
| WOK | TEMPEL | NAIP |
| HIP | FOA | RESIS |

R U P Y E L X O M S A E D T S P P R R R T J X P R
 V C N Q S K A Y V G O H W O K F Q A R I B O S A B
 T I E S D N Y G L E D T I S O K O N L V N Y Z H C
 Z E G A L T R O Q C N L S P R A N A U S H N I P L
 V T S N R T Z F P L S O E M A N K I A M K D A N Z
 N S S E A E H D Y A Z D W B U A F P T S K I G O X
 N J E D G W O E L I I T I A N I A F U Z L E H E R
 Y I Q P J G E I I P T E D N E P P E M K O S O M S
 P R T E H P A I O A Q M O A M A F D H R X N T R H
 A D S B O E M T M N A P K N M O I P S N O S Z S O
 T D G E E G S A R K O E T A Q S H W M H P R D Q E
 I O I E D G M Z I E D L K T A E D M T N T G O F S
 A A R F E X Q W R K S A A E E O E D D H I H S E Q
 E F B R S G E E I B R I K C E C J C S J R T A E A
 O G E A G V O E D O O M S Q S T W Q S H S E F G R
 G I O Z H M T P R T E B K Y A G R T G T C N D F N
 E L U N T F P D F S C E R T T N U U R D M W C Q E
 T O E T M Z R I X E G A U N T O E V K N L F D O C
 M C Y Y Z W R P V A O A S D T N E L M O E T I A C
 Q H R S M N O P Y R L T T E X S I S L Y E L B L N



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Planti handet tausen PNG pikinini i no skul



OI PNG pikinini.

Caroline Tiriman i raitim

WANPELA NGO edukesen sevis grup long Papua Niugini i tok planti handet tausen pikinini long kantri i no save go skul maski sapos gavman i givim fri edukesen.

Dairekta bilong Life PNG Care, Collin Pake i mekim dispela toktok taim dispela grup i wok long helpim ol pikinini long tupela setelment long Pot Mosbi wantaim wanpela Mobail Skul Program.

Dispela program i gat faivpela tisa, na ol i save yusim ol skul bas na skulim ol

pikinini long moning na long apinun long wanpela de.

Toktok bilong en i kamap tu long wankain taim gavman i bin tokaut olsem moa long 500 tausen ol pikinini i no save go long skul long ol taun na tu long ol rurel eria.

Mista Pake i tok tu olsem bikpela namba tru long ol pikinini long siti bilong Pot Mosbi i no save skul long wanem ol papamama bilong ol i stap rabis tru.

Olsem na Life PNG Care i bin statim dispela Mobile Skul long helpim ol dispela pikinini.

Australia na PNG i mas pinisim hevi bilong ol asailum sika na refuji



Ol refuji i sanap klostu long banis long Manus.

Caroline Tiriman i raitim

PRAIM MINISTA bilong Australia na Praim Minista bilong Papua Niugini Peter O'Neill i mas wok tru nau long stretim hevi bilong ol asailum sika long dispela ditensen senta bilong Australia i stap long Manus Provins.

Ben Lomai, loya bilong ol asailum sika i mekim dispela toktok long taim Praim Minista bilong Australia, Malcolm Turnbull i bin go long Pot Mosbi we em i bin bung wantaim Mista O'Neill na gavman bilong PNG.

Dispela em i namba wan taim bilong Mista Turnbull long raun long PNG bihain long em i kamap Praim Minista bilong Australia long 2015.

Ol ripot i tok tupela lida ya bai toktok long bihain taim bilong Manus ditensen senta, na tu long wei em Australia i save givim Aid o helpim i go long PNG.

Long yia i go pinis, gavman bilong Mista Turnbull i bin tokaut olsem bai oli pasim dispela senta, tasol no gat wanpela gutpela samting i kamap yet.

Moa long 1,000 Wes Papua i kamap PNG sitisen

Caroline Tiriman i raitim

WANPELA lida bilong ol Wes Papua pipel long Papua Niugini i tok tenk yu long gavman long givim sitisensip long ol Wes Papua pipel em ol i stap nau long ol refuji kem long kantri.

Fred Mambrasar husat i kodineta bilong Fri Wes Papua Kempen grup long PNG i mekim dispela toktok las wik taim PNG gavman i givim ol namba wan sitisensip pepa long moa long wan tausen ol refuji husat i stap nau long Is Awini Kemp long Westen Provins.

Mista Mambrasar i tok planti moa Wes Papua refuji long ol arapela hap bilong PNG bai kisim PNG sitisensip bihain.

Em i tok em i amamas tru long lukim olsem gavman i bihainim tok promis em i bin mekim sampela yia i go pinis



Fred Mambrasar, Wes Papua lida long PNG wantaim bubu bilong em Frits Cristhian Nama.

long larim ol Wes Papua pipel i kamap tru olsem ol PNG pipel.

Planti Wes Papua pipel i save ranawe lusim ples bilong ol na go insait long PNG bihain long ol hevi bilong wok politik na tu ol human raits hevi ol sekyuriti fos bilong Indonesia i save mekim long ol.

Ol papagraun i askim Newcrest long K3.5 bilien long Lihir ples balus

Sam Seke i raitim

OL papagraun bilong ples balus long Lihir i laik long Newcrest Mining Limited i mas baim ol K3.5 bilien kompensesen long graun em ples balus i sanap long en.

Media Opisa bilong Nimmarmar Lokal Level gavman long Lihir, Tony Sapan i tok ol papagraun i askim dispela mani long wanem Lihir Gold Mine em Newcrest i papa long en,

i bin yusim nating dispela ples balus inap moa long 21 yia na i no baim ol wanpela mani.

Mista Sapan i tok ol papa graun bilong Lihir Airport i tok lukaut olsem, ol bai pasim ples balus sapos ol i no kisim wanpela gutpela bekim long kampani.

Em i tok ol bai putim lip na planim gorgor bihainim kastom long tambuim ol pipel i go insait long hap bilong ples balus.

St John's Ambulance na PNG Fire Service bai wok bung

John Papik i raitim

I GAT bikpela tingting i stap nau long mekim Papua Niugini Fire Sevis na St John's Ambulance long wok bung long helpim pipel long taim bilong trabel.

Dispela bikpela tok orait i bin kamap long las wik taim ol i bin sainim wanpela tok orait long helpim wanpela narapela long taim trabel i kamap.

Sif Eksekutiv bilong St

John's Ambulance, Mollen Molki i tok narapela bikpela tingting em long bildim na strongim ol wok bung o patnasp namel long tupela grup i save lukautim imejensi sevis long helpim pipel.

Em i tok i gat plen i stap nau long sampela kain trening bai kamap namel long ol opisa bilong tupela grup na ol arapela stek holda bilong dispela wok bung long redi long APEC miting long yia bihain long Pot Mosbi.

Pasifik i wari long Vietnam stilim ol pis



Ol pislama

Caroline Tiriman i raitim

LAIN bilong Forum Fisheries Agency nau i lukluk long salim wanpela lain i go long Vietnam long toktok wantaim gavman bilong ol long stopim ol pipel bilong en i save kam stilim pis long Pasifik rijon.

Dairekta bilong Fisheries Development wantaim Forum Fisheries Agency long Solomon Ailan, Mike Batty, i mekim dispela toktok taim gavman bilong Nu Kaledonia i pulim kalabusim ol bot bilong Vietnam long kisim pis nating long solwara bilong Nu Kaledonia.

Ol ripot i tok ol seveilens balus bilong Frans i bin kisim tripela blupela bot bilong Vietnam i wok long stilim ol pislama long ol solwara bilong Nu Kaledonia long wik i go pinis.

Dispela tim bilong Frans i bin helpim tu ol gavman opisa bilong Solomon Ailan long kisim tripela narapela blupela bot bilong Vietnam i no long taim i go pinis.

Mista Batty i askim tu ol pipel bilong Pasifik long helpim gavman na was gut long ol dispela kain bot, na tokaut kwik sapos ol i lukim ol dispela bot klostu long ol ples bilong ol.

Nem bilong Manus MP i no stap long komon rol



Poto i soim 2016 llektoral Rol apdet long Hula na Irupara long 2017 nesenele ileksen.

Sam Seke i raitim

Memba bilong Manus Open, Ronny Knight i tok em i kirap nogut tru long lukim olsem em i memba yet long PNG palamen na rejista long resis long 2017 nesenele ileksen, tasol nem bilong em i no moa stap long Komon Rol.

Mista Knight i tok em yet na wanpela pikinini meri bilong em i bin rejista sampela mun i go pinis, na em i askim watpo na nem bilong tupela i no stap long lista bilong

Komon Rol. Em i tok klostu 50 pipel long Manus husat i bin rejista pinis i bin autim tu wankain wari bilong ol long em.

Mista Knight i tok em i bin traim long toktok wantaim Opis bilong llektoral Komisen long painimaut long dispela samting, tasol no gat wanpela man i save stap long opis long bekim ol askim bilong em.

Em i askim olsem wanem ileksen bai em i fri na fe sapos komon rol i no stret.

Mama karim bebi insait long balus



Bebi Haven, bihain tasol long mama i bin karim em long Cebu Pacific flait. Balus kampani i givim em bikpela presen tru we em i ken raun raun long balus long hap prais long bihain taim.

WANPELA mama i bin karim pikinini meri long balus bilong Cebu Pacific bilong Filipins. Balus i bin lusim Dubai na i flai i go long Manila long taim mama i bin pilim pen bilong karim bebi.

Mama i bin gat faivpela wik moa i stap bipo long bebi i kamap tasol dispela bebi i bin laik kamap hariap. Ol i givm nem Haven long dispela liklik pikinini meri.

Cebu Pacific i givim wan milien ea mail (air mile) poin long dispela bebi. Kampani i tok tu olsem dispela i namba wan taim long wanpela mama i karim bebi insait long balus bilong en.

Mama ya i bin pilim pen foapela aua bihain long balus i lusim Dubai. Ol kebin kru bilong balus i painim spes long fran bilong balus na ol i painim tupela nes husat i helpim mama long karim bebi. Tupela kebin kru

bilong balus em ol i bin kisim trening long wok bilong nes olsem na i no gat hevi i bin kamap.

Lid kebin kru Mark Martin i tok, "Bebi Haven, yu em mirakel bilong God long 36,000ft na mipela i kisim blesing long helpim yu long kamap gut. Bai mi no inap long lusim tingting long yu."

Kepten bilong balus i go pundaun long Hyderabad ples balus long India we ol dokta i sekap long mama na bebi bikos bebi i bin kamap hariap tumas we i no taim bilong mama i karim yet.

Narapela pasindia long balus i tok ol i no wari long taim balus i go pundaun long India. Em i tok, "Dispela kain samting i save kamap long ol muvi tasol na mipela i laki long witnes long dispela mirakel.

Missy Berberabe Umandal i tok, "Mipela i harim

wanpela singaut tasol na bihain mipela i harim krai bilong bebi na mipela i save bebi i kamap pinis."

"Sotpela taim bihain mama ya i kisim bebi na i go bek sindaun long sit bilong em. Em i strong tru. I bin gat tupela arapela bebi long balus na wanpela pasindia i karim sutkes i pulap long ol klos na arapela samting bilong bebi na i givim sampela long dispela nupela bebi."

Balus i kamap long Manila bihain long 18 aua tasol ol pasindia i no wari.

"I no gat komplek," dispela pasindia i tok. "Olgeta pasindia long dispela balus i bin kisim blesing."

Long mun Epril, wanpela meri i bin karim wanpela pikinini man long wanpela Jetstar Asia balus bilong Singapore. Em i givim nem bilong dispela balus long dispela bebi bilong em.

Bai UN i lukluk tasol long Syria i wok long kilim ol sitisen bilong en?



'Pasin bilong dispela gavman long yusim kemikol wepon i gat longpela hisori. UN komisin i rekodim ol taim dispela gavman i yusim nating ol bom, bagarapim pipel na kilim planti pipel.'

PRET na indai: dispela i bin strongpela samting tru long tingting bilong ol pikinini bilong Syria aninit long gavman bilong Bashar al-Assad.

Long 4 Epril, tupela balus i lusim Shayrat ples balus, gavman ples balus em Rasia i save sapatim. i luk olsem dispela tupela balus i dropim bom i gat kemikol ges na i kilim indai ol sivilien long Khan Shekhoun.

Wanem samting i kamap bihain long dispela em i nogut tru. Ol piksa i soim ol manmeri na pikinini na bebi i kisim bikpela bagarap tru na i pilim bikpela pen, planti i dai nabaut long graun na haus sik. Planti handet moa husat i kisim bagarap bai i pilim pen na karim bagarap bilong dispela birua inap long taim ol i dai.

bringim sem long gavman bilong Syria na ol sapota bilong en. Em i bringim sem tu long wol. Bai yumi lukluk tasol long dispela pasin gavman bilong Syria i wok long mekim?

Ol bekim bilong Rasia long dispela birua wantaim ol giaman toktok i laik soim olsem ol i no save long dispela pasin gavman bilong Syria i bin mekim.

Mipela i sori tru olsem long 12 Epril, UN Sekyuriti Kaunsil i no inap long sanap wantaim. Wantaim Yunaitet Stets, mipela i bin toktok long kamapim wanpela resolusen we i egensim tru dispela kemikol atek na strongim gen sapat bilong salim wanpela investigating tim bilong Organisation for the Prohibition of Chemical Weapons (OPCW). Em i isi

na i balens. Tasol Rasia i bin egensim – dispela i namba 8 taim em i sapatim Syria long 2011 inap nau. Rasia i tok nogat, na em i mekim ol giaman toktok long paulim ol memba olsem em i no save long pasin gavman bilong Syria i bin mekim.

Mipela i lukim dispela kain pasin bipo – ol i no sem long mekim ol giaman toktok. Mipela i les pinis. Long taim ol i tromoi poisin ges long ol pikinini, mipela i no inap harim moa long giaman toktok. Yumi mas lukim stret wanem samting i kamap.

Ol saintis bilong Briten i testim ol sempel i kam long ol pipel i bin kisim bagarap na test i soim olsem posin ges sarin i kilim na bagara-

pim ol pipel. Ol wokpainim bilong mipela i soim olsem ttupela jet bilong Syria i bin stap long Khan Shekhoun klostu long we ol dispela bom i bin pundaun.

Mipela i bilip gavman bilong Syria tasol inap long kamapim kain bagarap olsem. Olsem na gavman bilong Assad i bin kamapim dispela birua. Rasia i tok ol bom i pundaun long ples we oposisen i bin bungim ol dispela posin ges, em i giaman toktok bikos em i no tru.

Gavman bilong Syrian i gat nem nogut long yusim ol kain kain pasin nogut long ol pipel bilong en. Ol i dropim ol bom, kalabusim na givim pen na kilim nabaut planti pipel. UN Komisin i rekodim

planti bilong ol dispela pasin nogut na ol lain NGO tu i kisim ol evidens.

Syria i gat longpela histori long yusim ol kemikol wepon. UN i bin mekim wok painimaut na ripot bilong en long Ogas na Oktoba 2016 i soim olsem i bin gat ol kemikol ol i yusim egensim ol sivilien long Ghouta long 2013. Dispela ripot i soim olsem gavman bilong Syria i yusim ol kemikol tupela taim na ol lain ISIS i yusim kemikol wanpela taim.

Long 2014, Rasia i stopim toktok long bringim Syria i go long ai bilong intenesenel kot.

Intenesenel komyuniti i mas opim maus na toktok strong nau long kotim wanem

kantri i yusim kemikol atek long ol pipel. Stopim dispela pasin na bai i gat bel isi na sekyuriti long wol.

Ol pipel bilong Syria i karim bikpela hevi tru. UN Sekyuriti i bruk nabaut na i no inap stopim hevi long Syria. Yumi mas bringim bek wokbung. Na yumi mas rausim dispela pasin nogut long Syria.

Yumi ken stat na pasim tok long stopim pait nau na putim ol intenesenel soldia long was long dispela hap. Statim gen ol toktok bilong painim politikal solusen na ol ki stekholda i mas wanbel. Ol dispela samting bai i statim toktok bilong painim gutpela sindaun na rausim olgeta ol teroris tu.

PNG bisnis bai givim sevis long Apec kibung, Apec CEO i tok

OL lokal bisnis bai givim sevis long Apec kibung long 2018, Apec Papua Niugini Kodinesen Atoriti sif eksekutiv opisa Christopher Hawkins i tok.

Hawkins i tok 7-pela bikpela kontrak sevis em ol PNG kampani bai mekim.

Em i tokim Pot Mosbi Semba ov Komes long PNG gavman i no gat tingting long mekim wok bisnis long dispela taim.

"Mipela i makim ol opisa long putim aut ol pepa bilong tenda," Hawkins i tok.

"Gavman bai mekim samting em

i save gut long em; long protokol, imigresen, foren afeas na sekyuriti."

Hawkins i tok 7-pela bikpela wok o sevis i kamap long dispela kibung em long treanspot, hap bilong ol bung ples, soim piksa bilong ol manmeri i lukim, ples bilong ol manmeri i stap na slip, kaikai, heltkea, brending na sekyuriti.

Em i tok ol bai givim kontrak long ol lokal kampani long redim na givim presen long ol manmeri,.

Em i tok inap olsem 20,000 bilum em ol i redi long givim.

"Ol Apec siot em ol bai samapim na prinim long hia."

Em i tok long taim ol manmeri i gat planti tingting long hevi bilong sekyuriti PNG bai mekim olgeta samting long kamapim strongpela sekyuriti tasol long wankain taim bai laik soim ol 28 Apec kantri olsem PNG i wanpela kantri long ol i ken invest.

"Mipela i laik soim ol kantri olsem PNG i gat planti kalsa na i gat planti hap bilong ol i ken lukluk raun long en.

"Mipela i laik tokim ol olsem PNG i ples bilong ol turis long kam na amamas long em," em i tok.

Long Apec Haus, Hawkins i tok

wok long dispela haus i wok long kamap gut na bai pinis bipo long de bilong Apec kibung i kamap.

Dispela haus em Oil Search kampani aninit long takis kredit skim i mekim.

"Dispela em i gutpela rot bilong lukim ol kampani i mekim ol wok tu long kamap bilong kibung."

Em i tok dispela i soim projek i no stap no bungim hevi bilong gavman i no gat mani na prais bilong ol guds olsem wel, ges, gol na kopa i go daun.

Em i tok kibung i no bilong wan o tupela de tasol, "i bilong wan-

pela yia olgeta we 200 kibung bai kamap long en."

Em i tok namba wan ministerial kibung bai kamap long 9 Oktoba long dispela yia.

Narapela ol kibung we bai gat 200 manmeri bai kamap stat long Januari, 2018 i go na sampela ol kibung bai kamap long ol rijonal senta olsem Lae, Mt Hagen na Kokopo.

"Bikpela kibung bai kamap long Novemba we bai lukim 10,000 manmeri olgeta."

Ol de stret bilong kamap em long 17 na 18 Novemba na dispela ol de bai pablik holide.

NAQIA opim ol nupela haus bilong wokman

Josiah Ururu Kana i raitim

LONG Fonde 13 Epril, 2017 Nesenel Egrikalsa na Kwar-entin Inspeksen Atoriti (NAQIA) i opim 9-pela nupela haus bilong ol wokman bilong en insait long Kila Kila Stesin arere long Sabama, Pot Mosbi.

NAQIA i bin givim wok long ol kontrakta L&V, wanpela lokal konstraksen kampani long kirapim ol dispela haus. Ol dispela nupela haus i sanap long pos na ol wokman na wokmeri bilong dipatmen bai kisim ol dispela haus bilong slip.

Menesing Dairekta bilong NAQIA, Joel Alu i bin tok long taim bilong opim ol dispela haus olsem NAQIA i bin kamapim dispela haus skim long 2011 na em i kisim 6-pela yia olgeta long pinisim projek. Em i tok ol i bin bungim sampela hevi namel long tupela kontrakta na dipatmen i bin rausim namba wan kontrakta long 2014.

Em i tok olsem bihain long dispela hevi i bin kamap, di-

patmen i wet long rait taim na ol i kisim nupela kontrakta em L&V long pinisim wok long yia 2016.

"Ol kontrakta i no bin pinisim wok hariap bikos ol i wetim pawa na wara long kam insait long ol haus. Nau dispela lokal kampani i lukim ol haus i redi gut na mipela i opim," Mista Alu i tok.

Em i tok NAQIA i bin givim kontrak long L&V long pinisim gut ol dispela hai kavannen haus na maski ol i bin bungim kain kain hevi, NAQIA i amamas long tokaut long dispela ol haus i redi nau long dipatmen i ken putim ol wokman na wokmeri.

Namba wan man long kisim wanpela haus em stesin menesa, John Laku, husat i amamas long go insait wantaim famili bilong en.

Ol narapela wokman bai go insait bihain long tok orait bilong bod.

Ol haus i gat longpela pos na i gat tupela na tripela bedrum wantaim liklik veranda na naispela stail long insait na ausait bilong ol haus.

Gutpela komoditi prais bai strongim ikonomi

GUTPELA prais bilong ol komoditi olsem wel, ges, gol na kopa bai strongim ikonomi, wanpela akaunting kampani i tok.

Standart & Poor's Global Ratings i tok bikos long daun prais bilong ol komoditi i mekim kampani i save ikonomi i no strong.

Bikos long dispela, kampani i putim PNG ikonomi i go long B reting, kampani dairekta Craig Michael i tok.

Em i tok wanpela samting we bai lukim ikonomi i strong gen em long mekim prais bilong ol komoditi i go antap gen.

"Wok bilong LNG i strongim ikonomi tasol abras long prais long wol maket i mekim na olgeta plen i go klangki," Michael i tok.

"Moa yet prais bilong ol arapela komoditi olsem gol na kopa tu i go daun gen.

"Long dispela as mani we gavman i mas kisim na strongim ikonomi i no kam gut tumas na i daunim ol wok."

Em i tok mani we i stap long ol hap olsem Sovren fan i save strongim ikonomi.

Taim i gat kain fan, dispela mani we PNG i investim long ol arapela kantri bai mekim mani em yet na bihain helpim PNG gen.

Dispela em i as bilong kantri i laik kamapim Sovren Wel Fan tasol hevi bilong prais bilong ges i mekim na mani i no go gut long dispela fan.

Long mani kantri i yusim namel long 2014 na 2016 i go daun long 13 pesen.

"Maski long ileksen long namel bilong dispela yia, mipela i lukluk long daunim mak bilong dinau i kamdaun moa long dispela yia, olsem 3 pesen i kamdaun.

"Long dispela as mipela i ting mak bilong dinau mani bilong gavman bai stap daunbilo long 30 pesen."

Michael i givim tok lukaut olsem sapos gavman i kisim moa dinau dispela bai lukim mak bilong dinau bai abrasim



Spirit ov Hela, sip we i karim ges kago i go long Japan. Foto: Internet

30 pesen na go antap.

Em i tok 80 i go long 90 pesen mani gavman i yusim nau i stap long wankain mak na dispela i lukim tingting bilong em long daunim mak bilong dinau mani i strong. Em i tok dis-

pela em gutpela mak.

Tasol em i tok wanpela bikpela hevi bilong kantri em long hevi bilong lo na oda.

Em i tok hevi bilong lo na oda i mekim ol investa i gat planti tingting long kam insait na investim mani.

Laik bilong yusim pawa kamap bikpela

KANTRI i lukim planti manmeri i stat long yusim pawa.

Laikim bilong pawa i go bikpela na gavman nau i lukluk long mekim bikpela ol haidro pawa we em i gat long em.

Olsem na plen bilong gavman nau em olsem long 2030 em i laik lukim mak bilong ol manmeri husat i yusim pawa i s tap nau long 12 pesen i go antap long 70 pesen.

Moa long dispela em i laik planti manmeri i mas lain long yusim sola pawa bikos dispela i isi we ol manmeri i no ken yusim mani long baim.

Long nau bikpela projek gavman i plen long kamapim em 180 megawat (MW) dam long Karamui long Chimbu provins.

Dispela bai kost K6.6 bilien (US\$2b) we bai kisim 6-pela yia long mekim. Wanpela kampani bilong Itali, Salini Impregilo bai mekim dispela projek.

Narapela haidro skim em

Ramu 2 Haidro Pawa we bai wankain na gat 180 MW. Dispela skim bai stap klostu long Kainantu long Isten Hailans.

Long wankain kost tupela Saina kampani, Corporation Limited na Shenzhen Energy Grup bai kamapim.

Dispela senis bai lukim mak bilong pawa Ramu Haidro we i wok long kamapim bai go antap long 36 pesen.

Kumul Konsolidet Holdings bai menesing dispela projek. Aninit long pablik praivet patnasip (PPP) projek gavman na kampani wantaim bai bung na kamapim dispela projek.

Namba tri pawa skim we Gavman i lonsim pinis long Sentral provins long Februrari dispela yia.

Edevu Haidro Pawa projek bai kamapim olsem 50 MW long strongim saplai bilong pawa.

Long dispela PNG Pawa

bai kisim pawa long Saina kampani PNG Haidro Developmen Ltd. Eden Haidro pawa bai givim pawa long ol lokal ples.

Aninit long projek menesa, Chris Gubei, ol tok-tok i wok long dispela projek i stat long 2009.

Bikpela hap mani bilong fanim dispela projek bai kam long Hunan Provinsel Gavman bilong Saina wantaim mani mak bilong K630 milien.

Kamapim haidro pawa i gutpela tu long wanem PNG Pawa i no ken hatwok long yusim mani olgeta taim long baim fiul o disesel long ranim jenereta.

Long wankain taim PNG Fores Prodak i gat tripela liklik haidro disisel jenereting stesin long Baiune long Morobe.

Narapela em long MW Divune haidroelektrik projek long Popondetta, Oro provins. Dispela bai kamapim 15 MW pawa.



Praim Minista Peter O'Neill (lep han) i toktok wantaim Australia Praim Minista Malcolm Turnbull taim tupela i bung long Palamen na toktok long wok bilong tupela kantri na wok bisnis i kamap namel long tupela kantri. Foto: Australia Hai Komisen.

EXXONMOBIL, kampani we i mekim wok long PNG LNG projek i helpim ol skul long plent sait long Sentral provins.

Dispela ol skul i stap long Porebada, Boera, Papa na Lealea ausait long Pot Mosbi.

Long dispela wik kampani i sainim fanding tok orait long kamapim trening bi-

ExxonMobil sapotim plent sait skul

long Skul Bod ov Menesmen.

Dispela program em Esmie Sinapa Developmen Konsalten i kamapim we ExxonMobil PNG i sapotim wantaim mani.

Dispela menuel i bilong

helpim ol skul bilong ov menesmen long mekim gut wok bilong ol long lidasip na menesmen skil.

Kampani i givim olsem K300,000 long ol skul long dispela ol ples i ken ranim program i go long narapela

ol skul long Sentral long tupela yia.

ExxonMobil menesing dairekta Andrew Barry i tok tenkyu long Sentral Provinsel Gavman long long sapot bilong ol.

Em i tok dispela bai lukim ol bod memba i ken gat gutpela save bai ol i ken ranim skul bilong ol i kamap gut.

"Gutpela gavanens na lidasip long olgeta skul i bikpela samting we dispela i ken lukim ol sumatin i lain gut. Gutpela bod i helpim ol tisa na ol sumatin long kamap

gut na bihain kamapim gutpela komyuniti," Barry i tok.

Sentral Provinsel Deputi Edministreta Edward Kila i tok tenkyu long ExxonMobil long sapot bilong ol.

"Stap bilong gutpela gavanens, menesmen na lidasip i bikpela wari bilong mipela tasol wantaim sapot bilong yu mipela nau i ken gat save bilong menesim gut skul bilong mipela," e mi tok.

"Wantaim dispela mipela bai lukim ol pikinini bilong mipela i lain gut."

Rolaut bilong dispela pro-

gram em Esmie Sinapa konsalten bai go pas long em.

ExxonMobil i plen tu long kisim dispela program i go long ol skul long Hela provins.

Pastaim long dispela muninap olsem 30 opisa long provins i kamap long opis bilong kampani i askim long ol i laik ranim dispela program long provins bilong ol.

Kampani stat long 2011 i bin investim K21 milien long edukesen infrastraksa long ol skul long hap we PNG LNG projek i stap long em.



ExxonMobil menesing dairekta Andrew Barry (lep han) i sainim tok orait long kamapim Bod program long ol skul long Sentral wantaim Sentral Provinsel Deputi Edministreta Edward Kila. Foto: ExxonMobil

Top pailot bai ges spika long awot nait

WANPELA namba wan pailot bilong Papua Niugini husat i ranim ol balus bilong narapela bai kamap long Men ov Ona Awot nait long Pot Mosbi long neks wik Fraide.

Dispela man em Kepten Granger Narara bilong Dobu ailan long Milen Be provins.

Narara i go ranim balus long Yunaited Arab Emerairts (UAE), kantri klostu long Saudi Arabia long 1991.

Em i stap wok long dispela kantri inap nau. Bihainim em tu em liklik brata bilong Timothy na pikinini boi bilong em Nigel.

Long dispela taim Narara famili i mekim bikpela nem long ranim ol bikpela balus bilong UAE.

Men ov Ona awot em Digital Faundesen i kamapim long promotim wok bilong ol meri.

Dispela awot i kamap bilong tokim ol man long ol i no ken bagarapim ol meri na pikinini tasol i mas sapotim ol meri long wok bilong ol.

Narara i piksa bilong wanpela gutpela man long sapotim ol meri na wok bilong ol.

Faundesen sif eksekutiv opisa Beatrice Mahuru i tok em i amamas long Narara taim em i harim stori bilong em.

"Man husat bai toktok long mipela long dispela nait em Kepten Granger Narara husat bai toktok long mipela long kamap bilong em long liklik ples bilong em long Milen Be na nau i kamap wanpela namba wan pailot long wol long ranim ol bikpela balus long Yunaited Arab Emerairts," Mahuru i tok.

"Em i trupela Men ov Ona, we em i strongim brata bilong em, Timothy na pikinini

bilong em Nigel long bihainim em na ranim ol bikpela balus long UEA.

"Toktok bilong em long ol Papua Niugini em long no ken bagarapim ol meri na ol pikinini tasol i mas sapotim tingting na wok bilong ol.

"Long Narara i kamap olsem, em i kisim bikpela komitmen. Long gutpela kamap bilong em, e mi givim long gutpela skul em i kisim long papa bilong em husat i gat bilip long em na i sapotim em long skul bilong em.

Long nau Narara i sinia eksamina long ol bikpela balus bilong Ethihad Airways, wanpela balus kampani bilong UAE.

Narara i amamas long Faundesen i givim em sans long kamap na toktok long wok bilong em na long stapim pasin bilong bagarapim meri.

Nupela ol lida laik givim sans long ol meri

NUPELA ol lida insait long Pasifik Lidasip na Gavanens Prisink Lida long Bihain taim program i bilip ol i ken kamapim moa sans long ol meri long kamap strong long kantri.

Dispela program i sapotim ol pablik sevan long strongim teknikal na lidasip skil long kamap strong long wok bilong ol kamapim ol polisi na mekim ol wok.

Dispela i ken helpim ol long strongim ol polisi olsem Jenda Ekwiti na Sosel Inklusen.

Elisa Peono, GESI opisa wantaim Is Nu Britan Provinsel Helt Atoriti i tok program i helpim long developim na skulim ol yangpela lida long save wanem samting i gutpela, i stret na i orait long mekim.

Dispela bai mekim ol i ken helpim ol turangu manmeri husat i no gat gutpela sans long go moa o mekim ol bikpela wok long komyuniti.

"Dispela program i gutpela long bung wantaim long toktok na pasin bilong kamap gutpela lida," Peono i tok.

"Taim mipela i go aut long wok olsem ol lida long mekim ol polisi na disisen mipela bai gat inap save long mekim wok mipela i mas mekim."

Long nau Dipatmen bilong Pesinal Menesmen i wok long riviium aplikesen bilong namba tu lain husat bai kamap long dispela program we bai kamap long narapela mun.

Sylvia Gemung, wanpela opisa long Morobe Provinsel

Etministresen i tok program i helpim em gut.

"Papua Niugini na Australia Gavman i lukluk long strongim ol meri na kisim ol long mekim ol bikpela disisen na wok," e mi tok.

"Dispela em i traim na mi bilip long lewa bilong mi olsem bihain long mi pinisim dispela trening mi gat strong long mekim wanem samting mi bilip long mekim.

"Program bai helpim mi long kamapim ol wok bihainim ol polisi gavman i mekim.

Dispela program i kamap bihainim wok bung namel long Yunivesiti bilong Papua Niugini na Papua Niugini Pablik Edministresen Institut na Yunivesiti bilong Kwinslen, Australia.

Infomal Bisnis i save helpim tu ol manmeri



LIKLIK Bisnis olsem salim buai, smok, basket, sof drings i save helpim tu ol liklik manmeri long ples na siti long baim wanem samting ol laikim.

Kokopo i bin kam laip wantaim ol liklik infomal maket taim bikpela pilai bilong Nesenel Sofbal Sempionsip i kamap.

Dispela 4-pela de bilong pilai planti ol liklik manmeri i bin mekim gut mani long wanem samting ol salim long liklik infomal maket bilong ol.

Plantu mama i bin mekim kainkain kuk na karim kaikai bilong ol salim long ples bilong pilai long Kalabon. Ol manmeri husat

i go lukim pilai i no wari long painim stoa long baim wanem samting ol laikim long stretim bel bilong ol. Olgeta samting i stap stret long ai bilong ol na ino bikpela prais mani long bai ol kaikai.

Dispela 4-pela ol pilai i hot long pilai na ol mama tu i hot long salim ol kaikai bilong ol long sait bilong pilai graun.

Long poto i lukim sampela famili salim liklik kaikai bilong ol wantaim buai smok, loli twistis na sampela moa samting long sait bilong pilai graun long Kalabon long Kokopo Is Nu Briten.

Poto Stori Nicky Bernard



Kepten Granger Narara (lep han) wantaim pikinini bilong em Nigel long bikpela smuk balus bilong Yunaited Arab Emairts. Foto: Internet

NAQIA tokaut long wok painimaut bilong Kopi Beri Bora

GAVMAN bilong PNG wantaim Minista bilong Egrikalsa na Laipstok i luksave long kopi olsem em i bikpela rot bilong mekim mani na long makim rot bilong foren eksens na long lukautim sindaun bilong 80-90 presen kopi fama na ol kampani, olsem na em i putim K20 milien long sapotim wok bilong CIC na NAQIA long stopim CBB.

Dispela bai helpim long banisim ekspot mani bilong PNG wantaim ekspot bilong kopi na long stretim sindaun bilong ol 3 o 4 milien liklik fama.

Tasol dispela em i wan kwota tasol bilong K65 milien we ol i nidim long mekim dispela wok we ol NAQIA na CIC i nidim. Hap mani em gavman i tok promis long nupela gavman bai givim bihain long 2017 nesenele ileksen.

Nesenele Egrikalsa Kwarantin na Inspeksen Atoriti (NAQIA) i mekim bikpela toktok bilong ol sevei we ol i bin wokim long mun Mas na Epril 2017.

Dispela sevei i no bin pinis gut bikos ol i no inap long bungim olgeta risos, ol ripot bilong nau na tu ol i no wokim ol akwital bilong ol mani bilong NAQIA pastaim long ol narapela sevei bai kamap.

Minista bilong Egrikalsa na Laipstok Tommy Tomscoll i bin tokaut long dispela long Ela Beach Hotel long Pot Mosbi long stat bilong dispela mun. Em i tok olsem sevei i painimaut olsem tupela bilong ol provins long kantri we i save planim na salim kopi em Jiwaka na Isten Hailans provins i gat CBB binatang bilong bagarapim kopi long



Minista bilong Egrikalsa na Laipstok, Tommy Tomscoll i toktok long ol midia long wanpela pres konpres long Ela Beach Hotel, Pot Mosbi. Foto: Gary Fagan – EO NAQIA.

ol kopi plantesen na long ol smol holda kopi garten.

Long Jiwaka Provins, Banz na Minz distrik i gat CBB long ol plantesen na ol smol holda kopi garten, na wankain samting i stap long Daulo na Ungai Bena distrik long Isten Hailans.

Minista Tomscoll i tok olsem ol narapela provins we i stap boda wantaim dispela tupela provins olsem Westen Hailans na Simbu wantaim Morobe i gat birua long kisim dispela binatang bilong kopi tu. Em sapos ol atoriti na ol fama i no hariap long pasim rot bilong dispela binatang nogut bilong CBB long kalap i go long ol kopi diwai bilong ol.

Kopi Industri Koporesen wantaim NAQIA i traim long stopim rot bilong CBB binatang wantaim ol sekpoim long Jiwaka, Chimbu na Isten Hailans Provins.

Wok bilong stopim dispela binatang nogut bai kamap wantaim pablik awenes long ol rihabilitesen

senitesen wok bai mas kamap long ol kopi plantesen na tu long ol liklik kopi fama long daunim namba bilong CBB insait long ol kopi garten bilong ol.

NAQIA na CIC i holim ol miting namel long ol stekholda long Lae bilong toksave long olgeta ol fama bilong Morobe, Westen Hailans wantaim Jiwaka, Simbu na Isten Hailans provins. Dispela bung bai b tokaut gut long ol stekholda bilong kopi industri long wanem kain wok ol DAL, CIC NAQIA na Gavman bilong PNG i wok long mekim long banisim kopi industri long sik bilong CBB.

Pastaim long gavman i givim mani bilong mekim dispela wok long banisim CBB, NAQIA nau i wok long yusim ol mani bilong em yet long wokim ol sevei bilong pasim rot bilong CBB na ol pablik miting. Tasol dispela mani bai pinis klostu taim sapos i no gat helpim i kam long gavman hariap.

Rot konstrakseen indastri kisim helpim

MOA long 60 kontrakta i bin kisim sampela woksop bilong strongim save bilong ol long rot konstrakseen insait long Papua Niugini.

Dispela woksop em i wanpela hap bilong ikonimik patnasp namel long Papua Niugini na Australia long strongim rot konstrakseen indastri long PNG.

Tingting bilong dispela woksop em long kamapim gut ol bisnis plen bilong ol liklik na namel sais bisnis long abrusim ol asua i save kamap long ol biding bilong ol kontrak na long mekim wok bilong ol rot kontrak.

Ol toktok insait long woksop i go mak wantaim wei bilong Papua Niugini long 'mentenens pastaim' tingting bilong wok. Seketeri bilong Dipatmen bilong Transpot, Roy Mumu OBE, i tok amamas long ol sapot

bilong ol kontrakta. "Mentenns bilong transpot netwok bilong yumi i stap antap long strongpela praivet sekta. Em i laik bilong olgeta lain long lukim ol dispela liklik na namel sais bisnis long gro na resis long ol wok nau i stap." Mista Mumu i tok.

Ol woksop i bin kamap long Kokopo, Mt. Hagen, Lae na Pot Mosbi we i bin givim bikpela sans long ol kontrakta inap long toktok wantaim Dipatmen bilong Woks, Transpot, Treid Komes na Industri na tu long Nesenele Rot Atoriti.

Benk Saut Pasifik tu i bin wokim sampela toktok long ol dispela woksop moa long ol liklik kontrakta.

Wanpela kontrakta, Rosemary Sikal, i bin amamas long toktok wantaim ol senia opisa na tu em i bin

gat sans long save moa long ol gutpela we bilong ranim indastri.

"Em i bikpela samting tru long mi inap long long lukluk bek long bisnis bilong mi yet na lainim moa long groim bisnis. Sapot bilong ol gavman dipatmen long ol liklik bisnis lain olsem mi em i bikpela samting." em i tok.

Ol liklik na namel sais kontrakta i save resis long mekim planti wok mentenens long ol rot wok insait long Papua Niugini rot netwok. Dispela mentenens wok em i bikpela samting long lukautim ikonimik bilong Papua Niugini investimen long transpot netwok i mas stap gut olgeta taim.

Mani bilong ranim ol dispela woksop i bin kam long Australia Gavman aninit long Papua Niugini-Australia Transpot Sekta Sapot Program.

Seabed maining lo i kisim helpim



Dr Pierre-Jean Bordahandy and Dr Lili Song

Stori i kam long Fiji Times

OL Pasifik gavman bai klostu gat ansa bilong ol long seabed maining we bai i ken helpim ol long wokim ol lo bilong banisim ol.

Dispela inap long kamap taim Yunivesiti bilong Saut Pasifik (USP) i bin kisim sampela helpim long mekim ol

wok risets antap long ol wok analisis na tok stia taim em i winim wanpela grent.

USP i bin mekim wanpela toktok olsem tupela akademik bilong Skul bilong Lo i winim grent long mani mak bilong AUD 7000 i kam long Guangdong Institut bilong Intenesenel strateji.

Dispela grent bai fandim wanpela risets projek we bai lukluk moa long developim ligel fremwok bilong dip sea-maining long ol Saut Pasifik Ailan kantri.

Tupela akademik senia leksera, Dokta Pierre-Jean Bordahandy na leksera Dokta Lili Song, i save stap long USP Emalus Kempas long Vanuatu we tupela bai wokim ol risets.

USP ripot i tok olsem risets projek bilong Dokta Bordahandy na Dokta Song bai lukluk moa long ol nesenele dip-sea maining fremwok we ol Pasifik Ailan gavman i kamapim we i kisim tingting bilong Yunaitet Nesens Konvensen bilong lo bilong Sea na COP 21 na COP 22 ejen.

Ol bikpela kwesten we bai tupela i lukluk long en em

olsem; sapos i gat sampela bikpela samting i kranngki namel long intenesenel rejim we bai inap long senisim dip-sea maining operesen long ol hai solwara i go long ol hap insait long nesenele jurisdiksen; wanem em i wok bilong prinsipel was bilong dip-sea maining na sapos i gat sampela bikpela bruk namel long dip-sea maining birua i stap long ol nesenele rijim o nogat.

"Dokta Bordahandy, i tok bikpela solwara plua long daunbilo bilong Saut Pasifik em i gat bikpela as bilong mineral risos i stap, tasol sapos ol i bagarapim em bai gat sampela bikpela hevi long teknikal, envairomen, na ikonimik salens long kostal kantri na long intenesenel komyuniti," USP ripot i tok.

Dokta Song i tok ol wok glasim bilong ol bai helpim ol Pasifik Ailan gavman long mekim gutpela disisen wantaim gutpela save long kamapim ol lo bilong banisim ol dip-sea maining.

Projek bai stat long Desember 2016 na pinis long Novemba 2017.



Grup poto bilong ol Yunivesiti bilong Nesurel Risos i kisim Australia Awod i stap wantaim ol long 9-Mail Fam.

2017 NRL Dro bilong raun namba 8

Det	Hom	Awe	Pilai Graun	TV	Taim
Fraide, Epril 21			GIO Stediam	Fox	6:00 pm
Fraide, Epril 21			ANZ Stediam	Nine, Fox	7:50 pm
Sarere, Epril 22			ANZ Stediam	Fox	3:00 pm
Sarere, Epril 22			1300Smiles Stediam	Fox	3:50 pm
Sarere, Epril 22			Southern Cross Group Stediam	Fox	7:30 pm
Sande, Epril 23			ANZ Stediam	Nine, Fox	4:00 pm
Tunde, Epril 25			Allianz Stediam	Nine, Fox	4:00 pm
Tunde, Epril 25			AAMI Pak	Fox	7:00 pm

Pawa renking bilong NRL raun namba 7



Parramatta Eels i daunim ol Wests, 26-22, long ANZ Stediam long Mande.

2017 NRL Risal bilong raun namba 7

Det	Hom	Awe	Pilai Graun	TV	Taim
Fraide, Epril 14	24 (win)	9 (lus)	ANZ Stadium	Nine, Fox	4:00 pm
Fraide, Epril 14	6 (lus)	24 (win)	McDonald Jones Stediam	Fox	6:00 pm
Fraide, Epril 14	24 (win)	22 (lus)	Suncorp Stadium	Nine, Fox	7:50 pm
Sarere, Epril 15	26 (lus)	30 (win)	Brookvale Oval	Fox	3:00 pm
Sarere, Epril 15	20 (win)	8 (lus)	GIO Stadium	Fox	5:30 pm
Sarere, Epril 15	28 (win)	22 (lus)	WIN Stadium	Fox	7:30 pm
Sande, Epril 16	2 (lus)	28 (win)	Pepper Stadium	Nine, Fox	4:00 pm
Mande, Epril 17	26 (win)	22 (win)	AAMI Pak	Fox	4:00 pm

OL NRL tim husat i bin soim kala bilong ol gut long raun namba 7 bilong 2017 NRL sisen. Ol lain husat i go pas long NRL resis i bin makim ol long namba wan ples i go inap long namba 16 ples.

1 Storm (Las wik: 1)
Melbourne Storm i kisim top ples long renking bilong NRL bikos ol i kamap wina egensim ol Sea Eagles long Manly, asples bilong ol Eagles. Ol i bin pait strong na putim 4-pela trai insait long 20 minit taim ol i bin stat resis. Ol Storm i kisim 10-pela moa skoa long namba tu hap bilong resis na ol birua i no kisim wanpela skoa. Billy Slater i soim kala bilong em gut tru olsem bipo na em i helpim namba tu row pilaia, Felise Kaufusi, long putim tupela, taim 3-pela minit tasol i stap long bungim pinis bilong resis.

2 Broncos (Las wik: 2)
Ol Broncos i bin soim kala bilong ol gut long las wik Fraide we ol i bin skruim skoa bilong ol i go antap, 12-0, bihain long 15 minit. Ol i skruim skoa bilong ol i go antap moa long 20 poin taim ol asples birua bilong ol, Titans, i stap 22 taim tripela minit i stap yet long bungim pinis bilong resis. James Roberts i soim wanpela stail kala bilong em yet long las minit egensim bipo tim bilong em na putim las traime bilong ol Broncos i daunim ol Gold Coast.

3 Dragons (Las wik: 3)
Ol Dragons i bin pilai egensim ol Cowboys na strongim ol yet olsem ol inap long winim ol North Queensland taim Jonathan Thurston bilong ol Cowboys i no bin pilai. Kala bilong ol Dragons long namba wan hap i lukim ol i bin putim 5-pela trai. Ol Cowboys i sot long 6 poin long namba tu hap bilong resis na ol Dragons i stap long top ples yet long lata bilong Telstra Premiasip resis.

4 Raiders (Las wik: 4)
Ol Raiders i soim wanpela strongpela kala long raun namba 7. Ol i strongim banis bilong ol gut tru na daunim ol Warriors, 20-8. Joey Leilua i pilai egensim ol Nu Silan na putim wanpela trai na Jarrod Croker i takolim Roger Tuivasa-Sheck na sevim wanpela trai.

5 Sharks (Las wik: 5)
Ol Sharks i soim wanpela kain kala long asples bilong ol Penrith long las wik Sande. Ol Sharks i strongim banis bilong

ol gut tru long namba wan hap bilong resis we ol Panthers i no bin putim wanpela trai. Ol soim olsem ol i gat inap strong we ol i stap pas wantaim 12-2 long taim bilong malolo. Ol i strong moa long namba tu hap bilong resis na daunim ol Penrith.

6 Roosters (Las wik: 7)
Ol Roosters i pilai gut egensim ol Knights long las wik Fraide na putim tupela long namba wan hap na tupela trai long namba tu hap. Ol i strongim banis bilong ol gut tru we birua bilong ol i bin putim wanpela trai tasol. Nau ol i redi long pilai egensim ol Dragons, husat i stap top ples long lata, long Allianz pilai graun.

7 Bulldogs (Las wik: 9)
Ol Canterbury i daunim ol Rabbitohs long Gut Fraide we ol Rabbitohs i no bin putim wanpela trai long namba tu hap, taim ol Bulldogs i strongim banis bilong ol gut tru. Namba tu hap resis bilong ol Dog i slekim bun bilong ol South Sydney na dispela em i namba 3 stret win bilong ol. Ol i wet long salensim ol Wests Tigers long Sande.

8 Cowboys (Las wik: 6)
John Asiata i kisim ples bilong Jonathan Thurston na i helpim Scott Bolton long putim wanpela trai. Tasol, ol i lukim ples klia olsem top namba 7 pilaia bilong ol i no bin pilai egensim ol Dragons. Thurston i bin pilai tasol ol i bin pilai strong na strongim banis bilong ol long namba wan hap bilong resis. Skoa i sanap olsem ol Dragons i stap pas, 28-4, long taim bilong malolo, tasol ol i bin pilai strong na skruim skoa bilong ol i kam antap long, 28-22, poin. Wantaim dispela risal, ol North Queensland i redi long pilai egensim ol Newcastle long wiken.

9 Sea Eagles (Las wik: 8)
Ol Sea Eagles i bin putim 4-pela trai insait long 18 minit taim ol i statim resis na i pinisim resis bilong ol wantaim strongpela kala. Manly i bin pilai wankain egensim birua bilong ol, Storms, bikos ol Storm i daunim ol wantaim 4-pela poin, 30-26, bihain long ol i bin putim las trai bilong ol long namba tu hap bilong resis.

10 Warriors (Las wik: 10)
Ol Warriors i bin pilai gut long namba wan hap bilong resis, tasol i gat 13 asua

i kamap long namba tu hap bilong resis. Ol Raiders i putim tupela trai bihain long tupela asua aninit long ol 13 asua ol Warriors i bin mekim. Sapos ol i lukautim bal long dispela wiken long Melbourne em ol bai kamap wantaim gutpela risal.

11 Eels (Las wik: 13)
Ol Tigers i stap pas, 22-10, egensim ol Eels, tasol ol Eels i putim 3-pela trai long las minit na daunim ol Tigers long Mande. Bihain long ol Eels i lus long 4-pela stret gem, dispela tupela poin i strongim ol long mekim gut long ol resis i stap yet.

12 Rabbitohs (Las wik: 11)
Ol Rabbitohs i stap pas, 9-8, long las wik Fraide resis egensim ol Bulldogs inap long taim bilong malolo. Tasol, ol Bulldogs i daunim ol long namba tu hap. Sam Burgess bai no inap pilai tupela gem bikos em i mekim sampela asua. Ol South Sydney i redi long wanpela strongpela pilaia bai kamap egensim ol Brisbane long dispela wiken.

13 Titans (Las wik: 15)
Ol Titans i bin lus egensim ol Brisbane long las wiken gem bikos Kane Elgy i no kik gut long las minit na ol Broncos i kisim bal na putim las trai na daunim skoa bilong ol Titans.

14 Panther (Las wik: 12)
Penrith i pilai gut egensim ol Cronulla long las wik Sande tasol ol Sharks i strongim banis bilong ol gut na ol Panthers i no bin putim wanpela trai insait long 80 minit resis. Ol Cronulla i win wantaim 26 poin.

15 Wests Tigers (Las wik: 14)
Ol Tigers i daunim ol North Queensland long raun namba 6 resis, tasol ol i no pilai wankain olsem bipo long winim ol Parramatta. Ol i stap pas, 22-10, egensim ol Eels long namba wan hap, tasol banis bilong ol i no strong tumas we ol Eels i skruim skoa bilong ol na i daunim ol. Mitch Moses i bin pilai gut bilong ol Tigers, tasol nau em i stap long hap rot long joinim ol Parramatta.

16 Knights (Las wik: 16)
Ol Knights i no pilai strong na banis bilong ol tu i slek we ol Roosters i daunim ol, 24-6. Ol sapota bilong Knights i no amamas long kala bilong ol bikos ol i lus long asples bilong ol yet.

2017 NRL Lata | TELSTRA PREMIASIP

Posisen	Tim	P	W	L	D	B	F	A	+/-	Pts
1		7	6	1	0	0	191	104	87	12
2		7	6	1	0	0	134	85	49	12
3		7	5	2	0	0	148	86	62	10
4		7	5	2	0	0	138	116	22	10
5		7	4	3	0	0	182	123	59	8
6		7	4	3	0	0	134	105	29	8
7		7	4	3	0	0	110	116	-16	8
8		7	4	3	0	0	139	152	-13	8
9		7	3	4	0	0	150	143	-7	6
10		7	3	4	0	0	128	148	-20	6
11		7	3	4	0	0	122	154	-32	6
12		7	3	4	0	0	118	150	-32	6
13		7	2	5	0	0	126	135	-9	4
14		7	2	5	0	0	110	192	-82	4
15		7	1	6	0	0	156	206	-50	2
16		7	1	6	0	0	110	181	-71	2



Ramu NiCo wok-feri MV Carrie karim ol Madang PEC memba



Kepten bilong MV Carrie, Charles Buai wantaim sif enjinia na kru i sekim bris long Kinim, Karkar ailan.



MV Carrie i go sua long bris long Kinim long Karkar ailan.



Ol kru helpim ol Madang provinsal gavman opisa long go daun long Kinim.



Kepten Charles Buai i sanap wantaim Deputi Gavana bilong Madang, Rama Marisan na Am-benob LLG presiden long Kinim bris.

OL MADANG provinsal eksekutiv kaunsil memba i bin amamas tru long gutpela helpim Ramu NiCo Menesmen (MCC) i wokim long givim wok-feri o sip bilong kampani long karim ol i go long Karkar Ailan long sindaun long las miting bilong PEC.

Dispela miting i bin kamap long Kinim stesin, hetkwata bilong Sumkar distrik long Karkar Ailan.

Long Trinde, Epril 12 sip MV Carrie i bin katim solwara namba wan taim tru i go olsem long not kos na bihainim Isumrud Streit i go long Karkar ailan. Planti lain long NCR na ol moto-bot we i ran namel long solwara i guria stret long lukim dispela stail feri bilong Ramu NiCo i brukim solwara na go long Karkar ailan. Sip i go lusim ol PEC memba na long Fraide, Epril 14 em i katim solwara i go bek long kisim ol.

Kepten bilong MV Carrie, Charles Buai wantaim ol kru bilong em olsem man wali,

Timothy Liwa na wanpela arapela 'tura' Guyu na arapela tein bilong Kranget ailan Smith i lukautim gut sip i go long Karkar ailan na bihain go bek long Madang.

Deputi Jeneral Menesa bilong Koporet Opis bilong Ramu NiCo, Charlie Hu i tok olsem opis bilong Madang Gavana, Jim Kas i bin laik hariarim sip, tasol ol menesmen bilong Ramu NiCo givim bel na tok olsem em orait long MV Carrie i ken bringim ol Madang PEC memba fri tasol. Ramu NiCo i givim fri sevis long strongim pasin bilong "Wanpela Ramu NiCo, Wanpela Komyuniti".

Planti ol lain PEC memba na ol polisman i amamas stret na kisim gutpela tingting taim sip i katim solwara na muv namel long ol ailan na ol i lukim gutpela nambis bilong Madang.


Dispela sip bilong Ramu NiCo (MCC) MV Carrie i save givim planti gutpela helpim tru long ol liklik bot husat save bungim hevi namel

long solwara bilong Astro-labe Be. Planti taim MV Carrie i bin sevim laip bilong ol pasindia taim dingi i no gat petrol na i trip nating long solwara i stap.

Long 2013 taim balus i pundaun long Guabe na planti lain indai, MV Carrie em namba wan sip long katim solwara bilong Astro-labe Be i go long sevim ol lain i stap laip. Bihain long moning em i bringim ol polisman na ol lain long go mekim wok painimaut.

MV Carrie i bin helpim tu ol sik lain na mama i bungim bikpela hevi na ol pipel i karim em i go long klinik bilong kampani long Basamuk. Tru tumas dispela sip MV Carrie i kamap olsem "Good Samaritan" we i save sevim planti lain long Raikos eria na tu Madang provins.

Ating em wanpela man olsem ating MV Carrie bai kisim medal o bikpela luk-save pinis i kam long gavman bilong Papua Niugini long taim yet.



135 KM Slurry Pipeline

KBK Mining

BSK Refinery

Mogg: Dolphins i no pilai gut

KOSA bilong ol Redcliffe Dolphins, Adam Mogg, i tok olsem ol i no pilai gut.

“Kala bilong pilai i no kamap orait we mipela i lus, 12-10,” Mogg i tok.

Kepten bilong ol Dolphins, Samuel Anderson i tok wankain toktok olsem kosa bilong em na i tok, tim i no bungim stail bilong ol Hunters.

“Ol Hunters i pilai strong we ol i ran stret na strong, na mipela i no go pas kwik-taim long takolim ol, nogat.

“Mipela bai lukluk bek long plen bilong mipela gut na strong moa long go pas long olgeta taim,” Anderson i tok.



Kosa bilong Redcliffe Dolphin, Adam Mogg.



Pilaia bilong ol Redcliffe Dolphins i traim hat tru long brukim banis bilong ol Hunters.

Hunters i winim Stan Joyce Kap



Hunters i winim Stan Joyce Kap.

ADEX Wera i putim tupela trai i helpim ol SP Hunters long daunim ol Redcliffe Dolphins, 12-10, na winim Stan Joyce Kap long Sande apinun long Nesenel Futbol Stediam.

Ol Dolphins i putim mak long skoa bod pastaim long 23 minit bilong resis taim Moses Pangai i putim trai bihain long Stargroth Amean i mekim wanpela asua long taim Christain Hazard i kik.

Joshua Beehag i sanap long sailtain na kikim konvesen i go insait na skruim skoa i go antap long 6-0.

Adex Wera i bekim trai bilong ol Dolphins long 27 minit bilong resis na Ase Boas i kikim konvesen i go insait long bungim skoa bilong ol Dolphins, 6-6.

Ol Hunters i skruim skoa bilong ol i go antap taim Boas i kikim wanpela konvesen i go insait long 46 minit taim referi givim wanpela penelti egensim ol Dolphins klostu long trai lain bilong ol.

Tupela tim wantaim i mekim planti asua long ranim bal na long 65 minit, faiv-eit bilong ol Dolphins,

Tyson Gamble, i trikim gut banis bilong ol Hunters na putim namba tu trai bilong ol Dolphins. Ol Dolphins i go pas gen, 10-8, bihain long konvesen i no go insait.

Wera i putim namba tu trai bilong em taim 9-pela minit i stap yet long bungim pinis bilong resis. Dispela trai i skruim skoa bilong ol i go antap long 12-10 na ol i daunim ol Dolphins wantaim tupela poin.

Dispela em i namba 5 win bilong ol long namba 7 gem bilong Intras Supa Kap resis.

Hunters i stap namba 5 ples long lata



Adex Wera bilong ol SP Hunters i putim trai.

SP HUNTERS i stap namba 5 ples long lata bihain long raun namba 7 bilong 2017 Intras Supa Kap resis.

Ol i kisim tupela poin bihain long ol i win, 12-10, long wiken resis i bringim ol i go antap long 10 resis poin aninit long 5-pela win na tupela lus.

Ol Redcliffe Dolphins, Souths Logan Magpies na Hunters kisim wankain poin bihain long raun namba 7 resis.

Ol top 6 tim em:

Sunshine Coast Fulcons i stap namba wan

long lata wantaim 11 poin, Easts Tigers i stap namba tu wantaim 11 poin, Redcliffe Dolphins i stap namba tri wantaim 10 poin, Souths Logan Magpies i stap namba foa wantaim 10 poin, SP Hunters i stap namba faiv wantaim 10 poin na Townsville Blackhawks i stap namba 6 ples wantaim 8 poin.

Raun namba 8 em i bikpela resis bilong ol Hunters bai kamap egensim ol Burleigh Bears long Pizze Park, Australia, long Sarere.

Resis bai stat long 2.05 apinun.

Marum: Planti asua i kamap long gem

KOSA bilong SP Hunters, Michael Marum, i tokaut olsem planti asua i kamap long taim ol Hunters i pilai egensim ol Redcliffe Dolphins long las wiken.

Tupela trai wantaim wanpela konvesen kik em i no inap long ol Hunters i win.

“Mi ting olsem mipela dropim bal 8-pela taim long namba wan hap na mipela i no pinism ol takol bilong mipela gut. Kik tu i no kamap gut,” Marum i tok.

Marum i tok moa olsem i gat sampela gutpela samt-ing i kamap long ol Hunters i win. Wanpela samt-ing em ol Hunters i strongim banis bilong ol long stat bilong resis i go inap taim 80 minit i pinis.

“Skoa bilong mipela i no bikpela na mipela bai lukluk

long senisim sampela samt-ing. Tasol, ol bai i strongim

banis bilong ol gut tru inap resis i pinis,” Marum i tok.



Kosa bilong SP Hunters, Michael Marum, i kamapim rilesensip wantaim wanwok bilong em long Kwinslan Intras Supa Kap resis. Marum i givim wanpela bilum i go long kosa bilong Redcliffe Dolphins, Adam Mogg, bihain long wanpela gem i kamap long Brisbane, Australia.



Hunters pilaia i dropim bal.

Seleksen bilong Nambis Volibal i go het

KWALIFAIA resis bilong anda 18 nambis volibal resis i go het na ol bai makim 14 man trening skwat bihain long ol i traim resis insait long tripela mun.

Presiden bilong nambis volibal, Kila Dick, i tok olsem trening skwat bilong ol man anda 18 em ol bai daunim i go long 6-pela pilaia long dispela wiken.

Bihain long ol i makim 6-pela pilaia, ol bai go het long trening inap long Me o Jun na bai ol i makim tupela

top pilaia long makim Papua Niugini.

Bihain, tupela wankain pilaia bai trening long go resis long 2017 Yut Komonwelt Gems long Bahamas long Julai 19 i go inap long Julai 23.

Long wankain taim, PNG Volibal Federesen bai salim man na meri tim wantaim i go long Fiji long Komonwelt Gems Kwalifaia resis. Tasol, ol traim resis long nau i go het na bai pinis long pinis bilong dispela mun.

Ol bai makim Osenia Sempionsip tim long dispela mun

OL nesanel skwat etlit insait long kantri bai gat sans long dispela mun long soim ol yet olsem ol i redi long go resis long Osenia Sempionsip long Suva, Fiji, long Jun 28 i go inap long Julai 1.

Ol resis i kamap long Pot Mosbi, Lae na Niugini Ailan bai lukim ol etlit i stap long PNG i redi long go long sem-

pionsip o nogat.

Etlitik PNG i lukluk long makim fainal tim bilong ol long pinis bilong dispela mun.

Seketeri, Philip Rehder, i tok olsem ol bai makim tim long go long Osenia na wanpela bikpela samting em ol bai givim sans long ol etlit husat inap long kwalifai Wol Sempionsip.

Morgan i les long kisim ples bilong Thurston



North Queensland Cowboys hapbek, Jonathan Thurston, na faiv-eit, Michael Morgan.

PLEN bilong ol North Queensland Cowboys long makim Michael Morgan long kisim ples bilong Jonathan Thurston bai no inap karim kaikai bihain long Morgan i les long putim namba 7 jesi we Thurston i putim kala pinis.

North Queensland i luk-save gut long kala bilong Thurston bihain long em i bin kisim bagarap na Morgan i kisim ples bilong em na pilai egensim ol Dragons long las wik Sarere.

Morgan i tokaut bihain long ol Cowboys i lus, 28-22, egensim ol Dragons olsem, em i no inap long kisim ples bilong Thurston taim top pilaia bilong Maroon i risain.

Cowboys i lukluk long Morgan, husat i save gut long pilai hapbek, long kamap strongpela pilaia bilong klap long 2019, tasol Morgan i laik stap yet long faiv-eit.

"Mi no tingting long kisim long hapbek bikos dispela em i no posisen mi plen long en," Morgan i tok.

POM tim 3 winim taitol

Pom Kakana em sempion bilong ol man long Nesanel Sofbal Sempionsip

Nicky Bernard i raitim

NESENEL Sofbal Sempionsip long Kokopo long Is Nu Briten Provins i bin kamap long Ista wiken i lukim 14 tim bilong man na meri i resis long kisim taitol.

Tripela provins i bin flai go long Kokopo long stap insait long dispela resis. Nesanel Kapital Distrik (NDC), Morobe na Niu Ailan.

NCD i salim 4-pela tim bilong ol tupela bilong ol man na tupela bilong ol meri. Morobe i salim wanpela tim bilong ol man tasol wankain tu olsem ol Bluminski bilong Nu Ailan.

Is Nu Briten yet i kamapim tupela tim insait long wan wan distrik bilong ol. Kokopo i kamapim wanpela tim bilong ol meri na bilong ol man, Rabaul i kamapim tupela tim bilong ol man, Gazelle i kamap wanpela tim bilong ol man na meri, Is

Nu Briten Sentral i kamapim tupela tim na bring total namba i go long 14 tim olgeta i stap insait long dispela Nesanel Sofbal Sempionsip.

Ol statim pilai olsem raun robin na bihain go insait long fainal na gren fainal long pinisim dispela longpela Ista wiken.

Pom Kakana em nupela tim bilong NCD i kisim balus long las minit long go stap insait long dispela resis bihain long ol pilaia bilong tim wan bilong Pom i pul aut long joinim ol tim bilong Rabaul na Bluminski.

Pom tim 3 em ol yangpela mangi husat i save pilai long ol tim long Pot Mosbi Sofbal resis i kisim singaut long Presiden na Vais Presiden long kamapim nupela tim long go resis bihain long ol tim wan i pul aut.

Pom Kakana i no putim het bilong ol go daun na ol harim tok bilong tupela pres-

iden na kisim nem bilong NCD olsem Pom tim 3. Harim tok bilong ol i karim kaikai taim ol i go pilai na winim olgeta pilai bilong ol long raun robin na go insait long fainal. Long fainal ol winim ol resis bilong ol na go stret insait long gren fainal.

Long gren fainal Pom Kakana i putim het bilong ol go daun long kisim ol Rabaul 2. Rabaul 2 em ol pilaia bilong Pom tim wan husat i pul aut na kamapim tim Rabaul 2.

Pom Kakana i bin kisim bet pastim bihain long Gavana ToBaining i opim gren fainal pilai. Tingting bilong Kakanas long putim skoa pastaim bipo long wanem samting bai kamap long namba 6 na 7 inings.

Pom Kakana i skoa long olgeta innings bilong ol na lokim ol Rabaul 2 taim ol kisim bet long paitim bal. Rabaul i no bin skoa long tu-

pela innings bilong ol. Dispela i mekim ol yangpela tim 3 bilong Mosbi i paia lait long ol beting bilong ol na fil long stopim ol Rabaul long skoa.

Long top 6 bilong pilai Pom Kakana i kisim 8 ran taim ol Rabaul 2 i stap yet long 4, ol yangpela Kakana i lukim ol inap long 7 inings long kisim taitol bilong Nesanel Sofbal Sempionsip long han bilong brata tim bilong Pom tim 2 we olbin winim las yia long Pot Mosbi.

Long pilai bilong ol meri Pom Gold i winim bek taitol bilong ol long 9-pela yia olgeta taim ol pilai egensim ol Kokopo meri. Dispela pilai i bin strong tru we tupela tim wantaim i bin stap klostu klostu long skoa. Pom Gold i kisim spes long las ining na bringim skoa bilong ol go i long 11-9 long winim ol meri Kokopo long kisim taitol 9-pela taim olgeta.

KSL i sapotim AFL PNG

KINA Sekyuriti Limited (KSL) i sapotim AFL PNG wantaim K35, 000 long ranim resis bilong ol senia man na meri long dispela yia.

CEO bilong Kina Grup, Syd Yates, i givim sek long las wik na i tok, Kina Sekyuriti i amamas long kamap wanpela spona bilong AFL PNG long 2013 inap nau.

Em i tok ol bai yusim dispela mani long trening na ol narapela raun bilong ol.

Senia Futbol Operesens Menesa bilong AFL PNG, Rex Leka, i tok tenkyu long Kina



Sekyuriti long ol i spona yet. "Mipela i tok tenkyu long dispela spona i helpim ALF PNG long planti eria," Leka i tok.

Em i tok olsem senia resis bilong ol man, meri na risev divisen bilong ol man bai stat long PNG long Epril 22.

CEO bilong Kina Grup, Syd Yates, i givim sek i go long Senia Futbol Operesens Menesa bilong AFL PNG, Rex Leka.

2K Tigers i winim 3X3 Basketbal Salens



Ol 2K Tigers, wina bilong Ista Basketbal Salens.

OL 2K Tigers basketbal klap i gat gutpela de long Gut Fraide bihain long ol i bin winim taitel bilong namba wan Ista 3X3 Basketbal Salens bilong ol senia man.

Resis i kamap long Taurama Akwatik Indo Senta we ol 2K Tigers i winim 4-pela stret pul gem.

Oli bin daunim ol Titans long kwata fainal, daunim ol PBV2 long semi fainal na winim taitel bihain long ol i daunim ol

Goroka long gren fainal.

Long senia divisen bilong ol meri i lukim ol Cudgel i daunim ol Reunion, na Reunion i daunim ol Tubsy Snappers long anda 18 fainal resis bilong ol man.

Sif Eksekutiv Opisa bilong PNG Basketbal Federesen, Joel Khalu, i tok olsem resis i kamap gut we planti sapot i stap long kamap wanpela yia resis long kalenda bilong Federesen.

Tim PNG i winim wanpela silva na tupela brons medal



Tim PNG husat i go resis long Osenia Para na Junia Sempionsip.

TIM PNG i mekim gut long Para na Junia resis long Osenia Sempionsip.

Para etlit, Haoda Agari, i mekim gut long pul resis bilong em we em i bin daunim Osenia Sempion long Australia wantaim 3-pela set.

Long anda 18 junia tim i lukim Albert Arua lohia i winim Brons medal bilong PNG. Australia na Nu Silan i

winim gol na silva.

Vero Nime i winim wanpela brons meda long stending klas resis bilong ol meri na wanpela silva long Tim bilong ol meri.

Tim PNG i tok tenkyu long PNGOC na ol spona olsem Saina Embasi, Saina PNG Frensiip Asosiesen na Leon Entaprais long ol i sapotim ol wantaim man long dispela tri-

Lukim ol poto bilong 42 Nesenel Sofbal Sempionsip long Kokopo



Gavana bilong Is Nu Briten Eremas ToBaining i tromoi bal long kik statim gren fainal pilai bilong Nesenel Sofbal Sempionsip long provins bilong em.



Rana bilong Kokopo i wel go long bes taim pilaia bilong ENB Gazelle i traime long autim em.



Rana bilong Pom Kakana i ran long namba tri bes taim pilaia bilong Kokopo i traime long autim em.



Pitsa bilong ENB Gazelle i redi long tromoi bal.



Tim Pom Gold i kwin bilong Nesenel Sofbal Sempionsip long 9-pela yia olgeta.



Pitsa bilong Kokopo i redi tromoi bal. Em i kisim top pitsa awod.



Tim Kokopo man i traime long go insait long fainal tasol i sot long namel.



Tim Pom Kakana wantaim Tim Gazelle i bung bihain long semi fainal pilai bilong ol.




Tim Pom Black i go daun long Pom Gold long semi fainal pilai bilong ol.



Tupela gren fainal tim bihain long pilai bilong ol.

Oi Poto Nicky Bernard.



SPOTS

Lukim websait
bilong mipela

www.wantokniuspepa.com

Namba 2222

April 20 - 26, 2017

WHITE TUNA FLAKES
DIANA White



WHITE TUNA
insait
K 2.20



Tasty and Flavourful White Tuna for Everyone!

Manufactured by:
RD Tuna Cannery Ltd.



POM tim 3 winim taitol

Pom Kakana em sempion bilong ol man long Nesenel Sofbal Sempionsip

ridim stori long pes 26

POM Kakana wantaim tropi bilong ol. Poto: Nicky Bernard.

Mitsubishi FUSO Rosa Bus



Apgrad ensin
130Hp
4 silinda disel



**Ikamap Wantaim
26 na 30 Sit**

Hariap nau na go long
Boroko Motors dila bilong yu



Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg
Website: www.borokomotors.com.pg

